

M012: Anegegne

- 0,1 - - - - .
0,2 nû gestate mir hêrregot des .
0,3 daz ich dînen lop gesprechen mûge .
0,4 habe mîne zunge in dîner pflege .
0,5 und die rede von mînem munde .
0,6 wan ob ich alliu buoch kûnde .
0,7 sô wær mir der rede ze vile .
0,8 der ich hier beginnen wile .
0,9 nû beleites mîne sinne .
0,10 sam dû der eselinne .
0,11 ûf tæte ire munt .
0,12 daz si ire meister tæte kunt .
0,13 daz er niht vürebaz solte .
0,14 dâr er doch rîten wolte .
0,15 alsô pflêge dû mîner zunge
0,16 mit dîner wîsunge .
0,17 wan ich von dîner güete .
0,18 und von dîner diemüete .
0,19 von der wîle . und von den tagen .
0,20 wolte ganzlîchen sagen .
0,21 dâ dû gedæhtest inne .
0,22 wie dû mit dînem sinne .
0,23 die vinstre brehtest ze liehte .
0,24 und wie dû von nihte .
0,25 woltest wûrken alliu dinc .
0,26 als si hiute hât der werlte umberinc .
0,27 vernemet den allen bezzisten gedanc .
0,28 dâ von man saget oder ie gesanc .
0,29 den got umbe uns hæte .
0,30 êr er ie iht getæte .
0,31 oder êr ie iht wûrde .
0,32 dô gedâhte er der bûrde .
0,33 die er umbe uns wolte tragen .
0,34 wir wellen grôziu dinc sagen .
0,35 und wunderlîchiu mære .
0,36 von unserm schepfære .
0,37 nû suoche ich sîne güete .
0,38 daz er mich dâ vore behüete .

0,39 daz ez mir armen iht ergê .
0,40 als hier vore gebôt diu alte ê .
0,41 swer an dem wege iht lieze .
0,42 daz sich ein blinter dâr an stieze .
0,43 daz in der vasten solte .
0,44 diu selbe êwe ouch wolte .
0,45 swer einen brunnen wolte graben .
0,46 daz er ze gelten muose haben .
0,47 swaz dâr inne ertrünke .
0,48 alle die nû dunken .
0,49 daz ich ze tiefe welle graben .
0,50 die wile ich gerne von dem schaden .
0,51 leiten hin danne baz .
0,52 ich râte ouch den tumben daz .
0,53 daz si sich des gelouben .
0,54 und in diu gotes tougene .
0,55 sô tiefe niht gedenken .
0,56 daz si sich selben iht ertrenken .
0,57 ich wile des geltes ledic sæjen .
0,58 an allen den die dâr in .
0,59 ire gedanc gevellent .
0,60 die daz ervorschen wellent .
0,61 wâ got vore des genas .
0,62 dô der entwederz was .
0,63 himel . noch erde . noch daz licht .
0,64 soliche gedanke sint niwewiht .
0,65 und die sich versenkent dâr in .
0,66 wie die drî namen sîn .
0,67 und wâr umbe diu gotesgüete .
0,68 der grôzen übermüete .
0,69 dem tiuvel verhangte .
0,70 dâ er sich selben mit versankte .
0,71 unde im manic sêl sît an gewan .
0,72 und wie er dem êrsten manne .
0,73 valles verhangte .
0,74 an dem er wole erkante .
0,75 daz er mit decheinen dingen .
0,76 in wider mohte bringen .
0,77 wan mit sîn selbes bluote .
0,78 und wâr zuo der guote .
0,79 des geburt wolte .
0,80 an dem er wesse daz er solte .
0,81 in der helle êwiclîchen sîn .
0,82 und wâ mit diu armen kindelîn .
0,83 daz viur haben gekoufet .
0,84 diu dâ ungetoufet .
0,85 âne ire schulde scheident von hinne .
0,86 swer nâch solichem sinne .

0,87 tiefe wile gedenken .
0,88 der mac sich selben wole ertrenken .
0,89 nû vernemet kurzlichen daz .
0,90 wâ got vore allen tagen was .
0,91 und vore aller geschefte .
0,92 ûf sîner magenkrefte .
0,93 er gewaltlichen saz .
0,94 in im selben er was .
0,95 enbore truoc in sîn goteheit .
0,96 ouwê . wie samfte er entbite .
0,97 dirre werlte gruntveste .
0,98 ob dem apründe was sîn reste .
0,99 der gotesgeist dâ swebete .
0,100 wünnliche er lebete .
0,101 im wart sît nie wirs oder baz .
0,102 denne im ouch dô was .
0,103 ich tuon iu wêrlîchen kunt .
0,104 daz himel . unde erde dechein stunt .
0,105 gotes niht mohte entberen .
0,106 daz wær uns niht ze lêren .
0,107 daz er ir ze iht bedürfen solte .
0,108 dô er sie von êrste wûrken wolte .
0,109 er schuof sie wan durch sîniu kint .
0,110 den dienten si iemer mêr wole sint .
0,111 daz er werden hiez daz licht .
0,112 daz tet er umbe daz niht .
0,113 daz er ie vinster gewünne .
0,114 den mânen . und die sunne .
0,115 die schuof er ze diu .
0,116 daz si solten dienen iu .
0,117 sam tet er allez daz dâr is .
0,118 alle die des sint gewis .
0,119 daz er ez beschuof umbe daz .
0,120 daz im selben wære deste baz .
0,121 der geloube hât sêre missevarn .
0,122 got muoz alliu dinc bewar .
0,123 und ûf haben mit sîner krefte .
0,124 mohte im iht an sîner magenkrefte .
0,125 geschaden sô hête er müeje dannen .
0,126 ir sulet wizzen von wannen .
0,127 dem tiuvel kom die hôchvart .
0,128 durch die er verstôzen wart .
0,129 gotes gewalt was ie .
0,130 und verwandelte sich nie .
0,131 noch niemer getuot .
0,132 got ist genædic und guot .
0,133 als grôz was sîn hêrschaft .
0,134 und sîn gewalt . unde sîn kraft .

0,135 êr . diu erde . und des himels lieht .
0,136 geschaffen wurden von nihte .
0,137 sam si hiute sint in disen tagen .
0,138 dô ne wolte er die wünne niht eine tragen .
0,139 er wart ze râte in sînem muote .
0,140 mit sîn selbes güete .
0,141 und mit sîner wîsheit .
0,142 er wolte sîn lop machen breit .
0,143 und die wünne machen gemeine .
0,144 die er aleine .
0,145 ie gedâht hæte .
0,146 dô wâren sîne guote ræte .
0,147 daz er die engel werden hieze .
0,148 und daz er in lieze .
0,149 vrî ire gemüete .
0,150 ob si mit diemüete .
0,151 im dienten willicliche .
0,152 daz si ze sînem rîche .
0,153 deste bezzet reht hieten .
0,154 daz sumeliche gerieten .
0,155 alsô gâhes zuo ire verlore .
0,156 daz sach er vile wole vore .
0,157 sam tet er sîn selbes têt .
0,158 und alle die nôten .
0,159 diu im dâ von kûmftic was .
0,160 doch gunde er im der müeje baz .
0,161 die er dâ von gewünne .
0,162 denne ob er sie gedwünge .
0,163 mit decheiner slahte sinnen .
0,164 daz si in muosen minnen .
0,165 wan hête got die engel geschaffen alle .
0,166 daz si niht mohten kômen sîn ze dem valle .
0,167 sô hête er wider die getân .
0,168 die im dannoch bî wolten – gestân .
0,169 durch der verzageten siechtuom .
0,170 wolte er in niht unrehtes tuon .
0,171 den vesten und den stæten .
0,172 die sînen willen tæten .
0,173 vile gerne âne dwangsal .
0,174 êr wolte er dulden disen val .
0,175 und ouch sîn selbes têt .
0,176 êr er durch decheiner slahte nôten .
0,177 den guoten bræche ire reht .
0,178 swer hier hête einen knecht .
0,179 der im gerne wolte dienen .
0,180 ob er in dâr über vienge .
0,181 und bedwünge in dâr zuo .
0,182 daz er ez muose tuon .

0,183 denne under sînen danc .
0,184 sô hête er übel gedwanc .
0,185 den guoten willen geergeret .
0,186 âne aller slahte nôt .
0,187 dô diu gotesgüete dô .
0,188 an dem râte alsô .
0,189 mit sîner wîsheit saz .
0,190 dô geriet si im daz .
0,191 daz er schuof alliu dinc .
0,192 als siu hât der werlte umberinc .
0,193 den himel . und die erden .
0,194 er hiez daz licht werden .
0,195 und die engel dâr inne .
0,196 daz was sîn êrste stimme .
0,197 die got ie gesprach .
0,198 die engel schuof er daz si gemach .
0,199 iemer und wünne .
0,200 und mandunge .
0,201 mitsament im hâten .
0,202 daz hête im sîn güete gerâten .
0,203 ouch schuof der heilige Krist .
0,204 allez daz hiute ist .
0,205 in vüinv tagen kündet uns daz buoch .
0,206 an dem sehsten er den man geschuof .
0,207 und ouch sûmlîchiu tier .
0,208 der tiuvel geviel dô vile schier .
0,209 von dem himelrîche .
0,210 vile harte wîslîche .
0,211 got ez allez unterschiet .
0,212 von der vinsten teilte er daz licht .
0,213 daz ist der tac . und diu naht .
0,214 dem wazzer gap er sîne maht .
0,215 den sternem . und dem mâne unde der sunne .
0,216 baz danne ich gesagen künne .
0,217 gap er in besunder ire zît .
0,218 alsô begiengen si ez iermêre sît .
0,219 wie kleine er ez dô ordenete .
0,220 des ist dechein nôt .
0,221 daz wir daz allez gesagen .
0,222 wan wir der zît niht en haben .
0,223 daz wir sô verre komen dâr in .
0,224 niuwan daz wir mit disem beginnen .
0,225 iu ermanen ein teil .
0,226 wie sich huop unser heil .
0,227 und wie zageliche .
0,228 sich von gotes rîche .
0,229 der tiuvel selbe verstiez .
0,230 und wie er uns des entgelten liez .

0,231 die engel beschuof der gotesgewalt .
0,232 durch seiner güete einvalt .
0,233 daz si in loben solten .
0,234 des si doch niht en wolten .
0,235 – dunken genuoc .
0,236 unz er sich hôher huop .
0,237 denne er von rehte solte .
0,238 sînen stuol er setzen wolte .
0,239 eneben sînem hêren .
0,240 des entgulte er an sînen êren .
0,241 und was daz vile billich .
0,242 dô er niht lie genüegen sich .
0,243 daz er got als geleich was .
0,244 als dem insigele daz wahs .
0,245 daz umbe daz . dâr an gedruht wirdet .
0,246 daz ez im gelîchez bilede bîret .
0,247 des mohte im wole genüeget hân .
0,248 er dunke sich sô wole getân .
0,249 dô er sich selben ane sach .
0,250 in sînem willen er dô sprach .
0,251 er wolte dem oberesten sîn gelîch .
0,252 daz was iedoch vile tiuvellich .
0,253 wan er wole wesse daz .
0,254 daz got sô gewaltic was .
0,255 daz er in des wole wider bræhte .
0,256 dô tet er ez in der anedæhte .
0,257 swie ez im ergienge .
0,258 oder swie er ez anevange .
0,259 er wolte doch iemer wider gote sîn .
0,260 waz solte sancte Augustin .
0,261 denne meinen dâ mite .
0,262 er sprichet daz er sô lange niht enbîte .
0,263 mit sîner übermüete .
0,264 daz er der gotesgüete .
0,265 ie . gesmahte dechein teil .
0,266 sîn gedanc gebar im unheil .
0,267 bî daz er vol geschaffen wart .
0,268 dô warf in diu hôchvart .
0,269 in daz apgründe .
0,270 in . und alle die im der sünde .
0,271 wolten gehellen und bî gestân .
0,272 die muosen vallen von danne .
0,273 in den êwigen tôt .
0,274 dâ si angest und nôt .
0,275 und viurînez gebende .
0,276 habent iemer âne ende .
0,277 durch sô getâne sünde .
0,278 hât daz apgründe .

0,279 der tiuvel besezzen .
0,280 wir sulen niht vergezzen .
0,281 wir ne sagen waz sî die drî genende .
0,282 nû ist ez sô tief und sô vremede .
0,283 und sô gar gruntlôs .
0,284 mich en welle der êwige trôst .
0,285 bewîsen dâr inne .
0,286 daz ich ez mit mînem sinne .
0,287 niemer mac verenden .
0,288 wile aber er mir helfe senden .
0,289 sô wirdet sîn guot rât .
0,290 got selbe gesprochen hât .
0,291 swer von im reden wolte .
0,292 daz er dâr nâch niht denken solte .
0,293 er gæbe im ze munde .
0,294 daz er sprechen künde .
0,295 sô ez im koeme an die nôt .
0,296 sam tuo er ouch mir durch sînen tôt .
0,297 mînem geiste gebe er die lêre .
0,298 und ouch den hoeræren die êre
0,299 daz ez in ze staten kûme .
0,300 von dem vater . unde von dem sune .
0,301 und von dem heiligem geiste .
0,302 wile ich reden mit sîner volleiste .
0,303 dô danoch niht geschaffen was .
0,304 wan daz der gotesgeist saz .
0,305 ûf des luftes vederen .
0,306 dô en was er âne der namen entwedern .
0,307 daz der vater . und der sun ist .
0,308 er wart ouch ze decheiner vrist .
0,309 âne den heiligen geist nie .
0,310 die drî namen hête er ie .
0,311 wâr zuo si ouch genant sîn .
0,312 und ein goteheit an den drîn .
0,313 daz ist wunders sô vol .
0,314 daz ez niemandd mac ergründen wole .
0,315 ouch ist von solicher hêrschaft .
0,316 mennischlîcher unkraft .
0,317 ze redene vile schadelich .
0,318 nû solte ir biten umbe mich .
0,319 der von anegeunge alsô hieze .
0,320 daz er mir den munt entslôz .
0,321 der vater ist . der gotes gewalt .
0,322 der wirdet von rehte dâr zuo gezalt .
0,323 wan er gewalticlîche .
0,324 besezzen hât diu rîche .
0,325 und allez daz dâr ist .
0,326 er gebar in einer kurzen vrist .

0,327 mit seiner krefte den sun .
0,328 der heizet sîn wîstuom .
0,329 wan er wîslîchen tuon kan .
0,330 und ist vile gehôrsam .
0,331 sînes vateres willen .
0,332 an aller slahte dîngen .
0,333 der heilige geist ist sîn güete .
0,334 êr . er ie iht getæte .
0,335 diu hête sîn alles ermanete .
0,336 die drî tugende wâren ensament .
0,337 an der einen goteheit ie .
0,338 von diu wart er âne die namen nie .
0,339 nû vernemet ze wiu daz getân sî .
0,340 daz der namen gesîn ûz gemerket drî .
0,341 und minner noch mêre .
0,342 swie doch unser hêrre .
0,343 ander namen habe vile .
0,344 daz er umbe dise wile .
0,345 daz man die sunderlich êre .
0,346 sîn ist dechein durft mêre .
0,347 wan dise drî genenden .
0,348 dâ mit sint die vremen .
0,349 namen und die kunden .
0,350 bevungen ze allen stunten .
0,351 er heizet hêrre und gebietære .
0,352 er heizet rechær und vorhtigære .
0,353 er heizet unwandeliger .
0,354 und starker . und kreftiger .
0,355 ander namen hât er vile .
0,356 die ich den gleichen wile .
0,357 die hoerent alle an den gewalt .
0,358 der ze dem vater ist gezalt .
0,359 swâ wir den vater nennen .
0,360 dâ sulen wir die namen alle mit bekennen .
0,361 er heizet schepfære .
0,362 und got der gewærer .
0,363 er heizet rehtær und kûmftigære .
0,364 rihtære und vernumftigære .
0,365 heilant und wunderlîche .
0,366 alle namen die den sint gelîch .
0,367 die gehoerent an den wîstuome .
0,368 der dâ genant ist der sun .
0,369 swâ wir den sun nennen .
0,370 bî den sulen wir dise namen bekennen .
0,371 er heizet semfter und guoter .
0,372 und diemüeter .
0,373 milter und erbarmiger .
0,374 gedultiger . und genædiger .

0,375 und diu wâre minne .
0,376 swaz wir in solichem sinne .
0,377 der namen mûgen besliezen .
0,378 nû sulet ir ouch wizzen .
0,379 sô heizet der heilige geist .
0,380 alles guotes schüntære unde volleist .
0,381 gotesgüete heizet er ouch dâ bî .
0,382 ez ist niht durft daz er baz genennet sî .
0,383 ir ist genuoc an disen drîn
0,384 ir ne möhte ouch niht minner sîn .
0,385 wan sô gebræste des vollen dâ .
0,386 ez hât ouch anderswâ .
0,387 michel bezeichnenunge .
0,388 die man mit diutischer zunge .
0,389 niht mac errecken .
0,390 nû wile ich iu entdecken .
0,391 wâr umbe man den gewalt .
0,392 an den rât habe gezalt .
0,393 und umbe waz der wîstuom .
0,394 sî gezalt an den sun .
0,395 unde diu güete an den heiligen geist .
0,396 ich wile dir ez sagen dû sîn niht en weist .
0,397 ouwê . wie rehte er sprach .
0,398 der daz von êrste ane sach .
0,399 daz der gotesgewalt .
0,400 an den vater ist gezalt .
0,401 wan er nie niht geworhte .
0,402 durch liebe noch durch vorhte .
0,403 wan durch den sun hât er ez getân .
0,404 daz sulen wir alsô verstân .
0,405 der vater hête alliu dinc ie .
0,406 nû gebrast ir nie .
0,407 an sînem gewalte .
0,408 er ne gewünne sie wole ob er wolte .
0,409 dô kunde der wîstuom .
0,410 alliu dinc wole getuon .
0,411 hête er si ze werke gehabet .
0,412 dâ mit ist im niht widersaget .
0,413 er ne sî dem vater ebenhêre .
0,414 und hêten ie vile geleich êre .
0,415 an iegellichem dinge .
0,416 der sun hête an dem sinne .
0,417 daz der vater hête an dem gewalte .
0,418 als ich iu dâ vore von im zalte .
0,419 der sun ordenete alliu dinc .
0,420 als si noch iemermêre sint .
0,421 êr . iht geschaffen wære worden .
0,422 doch hête er den orden .

- 0,423 vile garliche verloren .
0,424 hête uns der gewalt niht geboren .
0,425 dô tet der gewalt durch den sun .
0,426 der dâ ist sîn wîstuom .
0,427 daz er guotes mahte .
0,428 nâch des wîstuomes ahte .
0,429 daz selbe hête diu güete .
0,430 vile williclichen in ire muote .
0,431 wan der gewalt . noch der wîstuom .
0,432 die en kunden niht getuon .
0,433 über ire willen noch en wolten .
0,434 noch en mohten . noch en solten .
0,435 dô en wolte diu güete .
0,436 die der vater . unde der sun hêten in ir huote .
0,437 die grôzen wünne niht vertragen .
0,438 daz die got eine wolte haben .
0,439 dô riet si dem vater daz .
0,440 der gewaltic ze geben was .
0,441 sît er sô rîche wære und sô hêre .
0,442 daz er eteswen mêre .
0,443 dâ mit solte rîchen .
0,444 si bat den sun ob er williclichen .
0,445 wole getuon kunde .
0,446 ze iegelicher stunte .
0,447 daz er den vater bæte .
0,448 daz er im sînen stat tæte .
0,449 dô sprach der gewalt ze dem wîstuome .
0,450 wie er im sîn stat solte tuon .
0,451 er sprach “dâ solt dû heizen werden .
0,452 den himel . und die erden .
0,453 und solte mit dîner krefte .
0,454 si ervüllen mit sô getâner geschefte .
0,455 der dîner helfe müeze durft sîn .
0,456 sô hâst dû geteilet daz guot dîn .
0,457 sô schol ûf haben dîn gewalt .
0,458 wan er dir vater ist gezalt .
0,459 allenhalben solt dû si bewarn .
0,460 nâch helfe sô sulen si harren .
0,461 ûf ze dîner güete .
0,462 dû solt mit diemüete .
0,463 siu ze allen zîten hoeren .
0,464 ob wir ez wellen stoeren .
0,465 durch decheine ire schulde .
0,466 sô sol si in die hulde .
0,467 wider gewinnen .
0,468 ez ne sî daz si an solchen dingen .
0,469 wider uns iht getuon .
0,470 daz dechein genâde hoere dâr zuo .

0,471 sô sulen si dulden dînen slac .
0,472 diu urteile wole mac .
0,473 ergên über die verworhte .
0,474 die got niene vürhten .”
0,475 hier müget ir wole hoeren an .
0,476 als ich dâ vore gesprochen hân .
0,477 daz si sîn iht bedürfen solten .
0,478 swaz si wûrken wolten .
0,479 wan daz si daz wolten .
0,480 daz wir dâ mit solten .
0,481 werden gerîcht .
0,482 “nû ez iu beiden gelîchet .”
0,483 sprach aber der gewalt .
0,484 der dem vater ist gezalt .
0,485 “ich heize ein erbe .
0,486 breitez und vile biderbe .
0,487 dâ wile ich selbe gewalticliche .
0,488 inne wonen êwicliche .
0,489 ich erzeige wole als ich mac .
0,490 unz an den jungesten tage .
0,491 allen den gewalt mînen .
0,492 ouch solte vürebaz sîn .
0,493 des gewaltic iemermêre .
0,494 mit volliclicher êre .”
0,495 mit gedanken disiu rede ergie .
0,496 dâ ne wart dechein wort nie .
0,497 under gesprochen .
0,498 wir haben ouch dâ mit niht zebrochen .
0,499 dem gewalte sîn reht .
0,500 als ir dâr nâch wole gesehet .
0,501 daz wir in gezigen hân .
0,502 daz er ûf welle geben sân .
0,503 her nâch diu rîche .
0,504 wan im selben vile unschadeliche .
0,505 diu verziht wirdet getân .
0,506 ez en sol niemandd sô verstân .
0,507 daz er niemer sô eralte .
0,508 daz er an dem gewalte .
0,509 deste harter iht verswache .
0,510 oder sich deste armer mache .
0,511 oder daz si sich iemer gescheiden .
0,512 wan daz er niemer mêr erzeigen .
0,513 wile . sô grôzen sînen gewalt .
0,514 noch sînen zorn sô manicvalt .
0,515 erzeiget an decheiner stat .
0,516 als er des tages tet .
0,517 dô er alliu dinc werden hiez .
0,518 und dô er den engel verstiez .

0,519 durch sîn hôchvart .
0,520 und sô er dô gesehen wart .
0,521 dô er sante die sinvluot
0,522 und sô er tagelîchen tuot .
0,523 mit regene . und mit winde .
0,524 den winter herte . den sumer linde .
0,525 und als er sich erzeiget denne .
0,526 sô sîn gewalt daz wazzer brenne .
0,527 sô er die tôte ermundert .
0,528 und die übel gesundert .
0,529 von den sînen kinden .
0,530 dâ sol sich underwinten .
0,531 der sun der rîche .
0,532 daz er sie wîslîche
0,533 iermêmêr besehe .
0,534 daz uns dechein leit geschehe .
0,535 und daz er die minne .
0,536 sô gevestene dâr inne .
0,537 swaz ie einer getuo .
0,538 daz die andern haben minne dâr zuo .
0,539 und sol ez alsô zesamene tragen .
0,540 daz der mennische . und die engel haben .
0,541 niuwan ein gemüete .
0,542 der salwirt der güete .
0,543 daz ist der heilige geist .
0,544 und wirdet sîn alles volleist .
0,545 under den drîn genenden .
0,546 wir mügen ez niht volenden .
0,547 daz wir dâr umbe wizzen .
0,548 wan alsô hât sich gevlizzen .
0,549 der vater durch der güete rât .
0,550 daz er sîn kint geerbet hât .
0,551 mit liuten . und mit lande .
0,552 daz er den sun sante .
0,553 daz tet er von rehte .
0,554 dô er sînem knehte .
0,555 wolte geben die widervart .
0,556 wan der mennische durch den sun geschaffen wart .
0,557 an disen Worten .
0,558 solte ir vleischlich warten .
0,559 und vile wole erkennen .
0,560 swie wir den name sunder nennen .
0,561 ez ne ist doch niht wan ein got .
0,562 der ir einen gît daz lop .
0,563 der hât ez in allen drîn gewegen .
0,564 gescheiden wir siu niht en megen .
0,565 swie doch diu buoch jehen .
0,566 daz si besunder sîn gesehen .

0,567 und ouch besunder vernomen .
0,568 dô der gotessun was komen .
0,569 dô man in solte toufen .
0,570 man sach den sun loufen .
0,571 under andern süntæren .
0,572 die ie iht dâ von gelêren .
0,573 die habent uns ie verjehen .
0,574 daz der heilige geist würde gesehen .
0,575 in einer tûben bilede .
0,576 und ouch dâ würde von himele .
0,577 des vaters stimme vernomen .
0,578 er sprach . “her ist mîn lieber sun komen .
0,579 den ich mir selbe erwelt hân .”
0,580 des habe niemann dechein wân .
0,581 daz si ie wurden gescheiden .
0,582 entweder von den beiden .
0,583 doch man von der wârheit jæhe .
0,584 daz man si hôrte und sæhe .
0,585 alle drî besunder .
0,586 iedoch ist ez wunder .
0,587 der ûf der erde dâ gie .
0,588 under den süntæren hier .
0,589 daz ouch der von himel sprach .
0,590 und daz man in ob der toufe sach .
0,591 sweben als ir ie habet vernomen .
0,592 in dem lufte wie daz mohte komen .
0,593 des wellen wir iu ein teil sagen .
0,594 wir mûgen ez niht verdagen .
0,595 wir ne bringen sîn iuch inne .
0,596 doch ez mennischlichem sinne .
0,597 etesware vile vremede ist .
0,598 vûre daz der heilige Krist .
0,599 alliu dinc bedâhte .
0,600 und si ze gesihte brâhte .
0,601 sît kom er von himel nie .
0,602 und was ouch ûf der erde hier .
0,603 und in dem apgründe alsam .
0,604 dechein ende er nie genam .
0,605 alliu dinc er bevâhen hât .
0,606 dô er geleiste den rât .
0,607 der gewalt ervûlte sînez bet .
0,608 daz im sîn güete tet .
0,609 wan daz reht hête diu güete .
0,610 swaz si gerne tuot in ire muote .
0,611 des ist ire volleist der gewalt .
0,612 der dem vater ist gezalt .
0,613 daz selbe tuot der wîstuom .
0,614 alsô ist geheizen der sun .

0,615 von diu was si ie in beiden ebenhêre .
0,616 ouch hêre der wîstuom die êre .
0,617 swaz er geordenete .
0,618 daz der gewalt und diu güete .
0,619 des niht widern solte .
0,620 dô muose ouch dem gewalte .
0,621 der wîstuom sîn gehôrsam .
0,622 und diu güete alsam .
0,623 swaz er getuon mohte oder kunde .
0,624 daz si im des wole gunde .
0,625 si ne mohte ez minniclîchen erwenden .
0,626 nû wer mac die zal volenden .
0,627 von den drîn gesant wart .
0,628 her in erde einez wort .
0,629 daz nam vleisch an sich .
0,630 durch uns wart er mennischlich .
0,631 und hêre an im die tugende .
0,632 der drîer genende .
0,633 den gewalt den ez her brâhte .
0,634 und den wîstuom der iz bedâhte .
0,635 und diu güete diu ez riet .
0,636 von der ez sich nie geschiet .
0,637 ez wart gebiledet nâch dem manne .
0,638 den der tiuvel gote an gewan .
0,639 daz was der mennische den man sach .
0,640 diu stimme diu von himel sprach .
0,641 von der was daz wort komen .
0,642 daz wær vile billîche vernomen .
0,643 von dem vater her ze tal .
0,644 daz man dâ hôrte den schal .
0,645 daz was diu starke goteheit .
0,646 diu an ir selber gebar die mennischheit .
0,647 in dem vleische was er gar .
0,648 doch gereichte sîn goteheit dar .
0,649 dâ diu stimme oben sprach .
0,650 und dâ man die tûben sach .
0,651 die drî tugende hêten ensament .
0,652 ervüllet alliu diu lant .
0,653 von diu mohte er vile wole reden .
0,654 und gên . und sweben .
0,655 swâ sô er wolte .
0,656 wan er alliu dinc ervûlte .
0,657 daz sîn ie ûf der erden .
0,658 deste minner iht mohte werden .
0,659 daz der vater von himel sprach .
0,660 oder daz man den sun hier sach .
0,661 daz neme niemand in sînen muot .
0,662 wan der geloube wære niht guot .

0,663 ez wære niuwan ein urdanc .
0,664 daz sich der heilige geist swanc .
0,665 dâ man toufete den gotessun .
0,666 daz muose er billîchen tuon .
0,667 und was ouch vile michel reht .
0,668 wan dâ man sît sînen kneht .
0,669 sancte – toufete .
0,670 und in dem wazzer besoufete .
0,671 aldâ wart er ouch gesehen .
0,672 und ist vile dicke sît geschehen .
0,673 daz man in iemer in tûben bilede sach .
0,674 swer iht guotes getet oder sprach .
0,675 in des herzen muoz er sweben .
0,676 und en mohte doch niht begeben .
0,677 den . der nie dechein sünde .
0,678 getet noch gevrumete .
0,679 nû habet ir wole vernomen daz .
0,680 daz der vater niht was .
0,681 von dem sune gescheiden .
0,682 noch der heilige geist von in beiden .
0,683 noch wellen wir ez baz bewæren .
0,684 daz si alle drî wæren .
0,685 in gelîcher stete ensament .
0,686 der vater . der den sun hête gesant .
0,687 der bewârte wole daz .
0,688 daz er gewaltic . wise . und guot was .
0,689 nû wie mohte er wîslîcher getuon .
0,690 wan daz er die wîle dô er den sun .
0,691 in sîner muoter bûche lac .
0,692 der werlt . als von êrste pflac .
0,693 der dâ genant ist der wîstuom .
0,694 wie mohte er anders guotlîcher getuon
0,695 denne daz er die meintæten niht verkôs .
0,696 und si als drâte niht verlôs .
0,697 dô si den sun viengen .
0,698 unde daz mort an im begiengen .
0,699 und er vile barmiclîche .
0,700 ûf ze dem himelrîche .
0,701 nâch helfe rief lûte harte .
0,702 daz er ez dô sparte .
0,703 und ez als drâte niht en rach .
0,704 noch ez ungerne sach .
0,705 dâ habet in diu güete .
0,706 diu dâ was in dem râte .
0,707 daz er in her vrumete .
0,708 daz er durch unser sünde .
0,709 gemartert muose werden .
0,710 dô der himel . zuo der erden .

- 0,711 von des sunes tôde erwege .
0,712 daz er ez dô gehabete .
0,713 daz ez allez niht zebrast .
0,714 unde daz diu sunne niht gar erlasch .
0,715 diu sich verwandelt hête .
0,716 dâ half der wîstuom unde diu güete .
0,717 den gewalt bewarn .
0,718 ez wære anders allez sament zevarn .
0,719 diu güete truoc im den zorn .
0,720 der wîstuom half daz ez niht wart verloren .
0,721 der gewalt ez vaste habete .
0,722 daz im diu bewegede niht schadete .
0,723 vile dicke erzeugte der sun .
0,724 daz er den gewalt . und den wîstuom .
0,725 und dâr zuo die güete .
0,726 vile volliclichen hête .
0,727 wan uns von im geschriben ist .
0,728 aller der buoche list .
0,729 den er ûf der erde vant .
0,730 er überziuhet in allensament .
0,731 den gedanken er widersprach .
0,732 in alliu herze er wole sach .
0,733 daz was ein michel wîstuom .
0,734 dô er dâ wider niht wolte tuon .
0,735 daz man in stiez . und sluoc .
0,736 und manic scheltwort vertruoc .
0,737 dô erzeugte er michel güete .
0,738 wan er ez wole gewidert hête .
0,739 er machete gereht die krumbe .
0,740 und wîste die tumbe .
0,741 den blinden er ire lieht gap .
0,742 dô er sibent tûsent satete .
0,743 und vierzic tage was ungâz .
0,744 dô erzeugte er wole daz .
0,745 daz er den gewalt und die güete .
0,746 und den wîstuom hête .
0,747 er was ez eine allezsam .
0,748 des uns kurzlichen ermanete .
0,749 der uns disiu wort versprach .
0,750 den heiligen geist den man dâ sach .
0,751 in dem lufte oben sweben .
0,752 ze wære hête den begeben .
0,753 der gewalt und der wîstuom .
0,754 daz ist der vater . und der sun .
0,755 sô ne mohte er noch en kunde .
0,756 sich ze der stunte .
0,757 hân gebildet ze einem vogele .
0,758 noch mit im sîn gewesene dâ obene .

0,759 er was ez allez der dâ gie .
0,760 er hête ez dort . und hier .
0,761 enbeidenthalben sô bedâht .
0,762 den er dâ her hête brâht .
0,763 daz den iht geriuwe sîn kumft .
0,764 unz er ouch die sigenumft .
0,765 an dem tiuvel genam .
0,766 noch daz der vater nie gewan .
0,767 dechein trüebe umbe daz .
0,768 daz des sunes armuot sô grôz was .
0,769 alsô bedâht ez der heilige geist .
0,770 der sîn alles was volleist .
0,771 und schüntære .
0,772 daz âne aller slahte swære .
0,773 ez beleiben solte .
0,774 und daz er sich dâ wolte .
0,775 lâzen . hoeren . und sehen .
0,776 der wârheit sulen wir hier jehen .
0,777 ze wâr . er tet ez umbe daz .
0,778 daz wir gelobeten deste baz .
0,779 an die toufe . und an den gotessun .
0,780 wie mohte er guotlîcher getuon .
0,781 er wolte ouch dem toufære .
0,782 erzeigen daz er wære .
0,783 daz wære gotes lamp .
0,784 dâ mit sît ir des ermanet .
0,785 daz ire drîer decheiner .
0,786 von dem anderm nie wart gescheiden .
0,787 der nû wære .
0,788 ein boeser irrære .
0,789 der vrâget uns übellîchen des .
0,790 dô er diu helfe selbe was .
0,791 ze wiu er daz tæte .
0,792 daz er sô tiur an dem kriuze bæte .
0,793 und dô er zuo der marter gie .
0,794 daz er sô harte vorhte die .
0,795 daz er driu gebet .
0,796 ûf ze sînem vater tet .
0,797 ob er si mohte verwarn .
0,798 dô er sich selbe bewarn .
0,799 kunde vore sêre .
0,800 wen er dô helfe bæte mêre .
0,801 hête im diu marter niht wê getân .
0,802 daz gæbe eteswem den wân .
0,803 daz er niht mennische wære .
0,804 dem vleische was vile swære .
0,805 swaz er im wider muote erbôt .
0,806 im tet vile wêr der tôt .

0,807 dô rief ez zuo der goteheit .
0,808 der nie gebar dechein leit .
0,809 daz si ez niht en lieze .
0,810 daz was ouch reht daz ez den vater hieze .
0,811 der ez an im selben dâ gebar .
0,812 und im klagete daz im âne schulde wær .
0,813 noch müget wir vile rede dâ von pflegen .
0,814 wan daz wir ez ergründen niht en megen .
0,815 von diu lâzen wir ez enzît
0,816 wan der hêrre – quît .
0,817 ez gebær im lîhte michel leit
0,818 swer ze vile von der goteheit .
0,819 sich wile an zücken .
0,820 und daz ez in lîhte müge verdrücken .
0,821 der ez gar ervorschen welle .
0,822 hête ich durchvaren den himel . unde die helle .
0,823 und daz paradîse .
0,824 und wær ouch alsô wîse .
0,825 als der hêrre – was .
0,826 und kunde swaz man ie gelas .
0,827 sô en mohte ich mit dem liste .
0,828 iu daz minneste .
0,829 wort niht errecken wole .
0,830 wan ez ist wunders sô vol .
0,831 von diu sulen wir mit mâzen .
0,832 die rede enzît lâzen .
0,833 swer nû ist armes sinnes .
0,834 daz er sich des dinges .
0,835 berihten niene künne .
0,836 der sehe an die sunne .
0,837 der got daz gegeben hât .
0,838 daz man sie in manigem ende verstât .
0,839 si wirdet wîze gesehen .
0,840 unde muoz man ir doch hitze jehen .
0,841 ir ist ouch daz reht gesetzt .
0,842 daz si truckenet . und netzet .
0,843 swerzet . und wîzet .
0,844 und doch ein schîne glîzet .
0,845 daz tuoch bleichet si daz ez wîz wirdet .
0,846 dem lîbe si doch swerze bîret .
0,847 si derret die erde . und daz holz .
0,848 si zelæzet daz wahs . und daz smalz .
0,849 der disen gewalt der sunne .
0,850 von êrste wolte gunnen .
0,851 daz si stêt an dem himele .
0,852 und wûrket hier nidene .
0,853 diu werc alliu besunder .
0,854 sô getâner wunder .

0,855 hât er geschaffen alsô vile .
0,856 der siu alliu sament wile .
0,857 ergründen . und erzelen .
0,858 in behüete got er muoz vallen .
0,859 wande er ez ein wunderlich got ist .
0,860 wie den heiligen Krist .
0,861 dâr zuo treip sîn barmheit .
0,862 ze vertilgen unseriu leit .
0,863 von himel zuo der erden .
0,864 umbe die er geruochte mennische werden .
0,865 und umbe wie getâne schulde .
0,866 wir verluren gotes hulde .
0,867 unde umbe waz er daz tuon wolte .
0,868 daz er den tôt gerne dolte .
0,869 daz er uns dâ mit nerte .
0,870 denne daz er werthe .
0,871 Adâmen sînen val .
0,872 unde umbe waz er geschuof den . der dâ sol .
0,873 in der helle êwiclichen sîn .
0,874 und wie diu armen kindelîn .
0,875 daz viur haben gekoufet .
0,876 die dâ ungetoufet .
0,877 scheident von hinnen .
0,878 des sulen wir nû beginnen .
0,879 got hête im selben getân unreht .
0,880 hête er sô geschaffen sînen kneht .
0,881 daz er niht mohte sîn gefallen .
0,882 wider den engelen allen .
0,883 hête er verre getân .
0,884 wir mûgen ouch dâr an verstân .
0,885 daz ez – gewesen wære .
0,886 wider den oberesten kôre .
0,887 den wir dâ sulen bûwen .
0,888 verdienen wir in mit triuwen .
0,889 nû vernemet waz diu werc sîn .
0,890 daz diu armen kindelîn .
0,891 die nôt habent erarnet .
0,892 daz sich got über siu niht erbarmet .
0,893 si hêten mit ire missetæten .
0,894 ob si ez gelebet hêten .
0,895 gekoufet doch die hellen .
0,896 und daz diu buoch daz wellen .
0,897 ez sî umbe siu alsô getân .
0,898 si wæren Luzifern bî gestân .
0,899 ob er si des hête gebeten .
0,900 daz buoch sprichet an genuoge steten .
0,901 daz ein ieslich mennische lebe .
0,902 unz niht bezzers an im werden müge .

0,903 dô got ire künftigen val gesach .
0,904 hête er dô gesehen daz .
0,905 daz si hêten gerâten .
0,906 sam die zwelivboten tâten .
0,907 er ne hête siu sô niht geletzet .
0,908 si hêten sich gesetzt .
0,909 wider die goteshulde .
0,910 von ire vordern schulde .
0,911 kom ez ein teil .
0,912 die verwürkent in ire heil .
0,913 vile manigen enden hier .
0,914 si und alle die .
0,915 die mit decheiner gernede .
0,916 verwürkent gotes erbermede .
0,917 die geschuof er alle umbe daz .
0,918 daz ez ein volliu zal was .
0,919 von der goteheit was daz vore besehen .
0,920 swaz uns solte geschehen .
0,921 oder swie wir gerâten wolten .
0,922 daz wir daz dulten solten .
0,923 daz was michel grôzer reht .
0,924 denne daz diu guote vorebesiht .
0,925 dâ gelücket wære .
0,926 der gewalt hête ouch die êre .
0,927 wolte er ez getân haben .
0,928 daz er allen unsern schaden
0,929 wole hête erwendet .
0,930 sô hête er geschendet .
0,931 des wîstuomes vorebesiht .
0,932 und hête im selbe getân unreht .
0,933 dô der wîstuom . und der gewalt .
0,934 und diu güete wâren ebenalt
0,935 wes liezen siu daz vore besehen
0,936 daz uns solte geschehen
0,937 sô grôzlicheu êre .
0,938 si en wær niht gewesen sô hêre
0,939 diu heilige wîsheit
0,940 hête si alliu unseriu leit
0,941 des êrsten under varn .
0,942 der wîstuom muoz ez allez bewarn
0,943 und rihten iermêre
0,944 sô hât der gewalt die êre
0,945 daz himel . und erde .
0,946 tal . und berge .
0,947 wâc . und winde .
0,948 und daz apgründe .
0,949 muoz im sîn gehôrsam .
0,950 im en mac niht widerstân .

0,951 im muoz dienen der luft .
0,952 sô hât ez allez gedinge unde vluht .
0,953 zuo der gotesgüeten .
0,954 ob si ze dem êrsten hêten .
0,955 uns bewart alsô verren .
0,956 daz uns mohte gewerren .
0,957 niemer niht mêre .
0,958 sô en hêten si niht die êre .
0,959 die der vater . und der sun hât .
0,960 hêten wir ire helfe rât .
0,961 waz bedorften wir ir denne .
0,962 ein teil ich dâr an erkenne .
0,963 daz ez wider den gewalte wære .
0,964 hête unser schepfære .
0,965 sô geschaffen mennischlich geslehte .
0,966 daz ez gevallen niene mahte .
0,967 noch daz im niht mohte geschaden .
0,968 sô mohte er ouch gewalt niht haben .
0,969 mit uns ze tuon swaz er wolte .
0,970 von rehte ez wesen solte .
0,971 allez daz nû ist .
0,972 uns hât der heilige Krist .
0,973 dâ mit ze vrituome brâht .
0,974 und hât doch sîn reht bedâht .
0,975 daz ez gewesen wære .
0,976 wider den oberesten kôre .
0,977 und wider den engeln allen .
0,978 ob niht mohte sîn gevallen .
0,979 unser vater Adâm .
0,980 daz wirdet uns hier ûf getân .
0,981 dô die engel got verliezen .
0,982 und sich selben verstiezen .
0,983 der micheln êren .
0,984 dâ si zuo geschaffen wâren .
0,985 dô stüende der zehende kôre lære .
0,986 unserm schepfære .
0,987 daz erbarmete .
0,988 und die gotesgüete .
0,989 diu in sît von himel treip .
0,990 sô manet in des sîn wîsheit .
0,991 er hête vile wole vore besehen .
0,992 daz den engeln geschehen .
0,993 sûmlîchen wære .
0,994 in bat sîn güete daz er iht lære .
0,995 den kôr lieze durch ire missetât .
0,996 im gap sîn wîsheit den rât .
0,997 diu allez dinc rihten sol .
0,998 ob er der engel val .

- 0,999 wole wolte ersetzen .
0,1000 er solte im selbe einen sun schepfen .
0,1001 vrîn sînes muotes .
0,1002 der des selben guotes .
0,1003 mit dieneste ûf der erden .
0,1004 wirdic solte werden .
0,1005 êr . er den stuol besæze .
0,1006 ob er gotes vergæze .
0,1007 ze dem tiuvel gevienge .
0,1008 daz . daz sô ringe ergienge .
0,1009 daz der kôre lære .
0,1010 bestüende niemer mêre .
0,1011 durch decheiner slahte dinc .
0,1012 swenne ez alliu sîniu kint .
0,1013 hier vile wole bewarte .
0,1014 daz er siu denne vuorte .
0,1015 an der engel stat .
0,1016 sîn güete in des bat .
0,1017 daz er im daz paradîse .
0,1018 gæbe ze einem hûse .
0,1019 und lieze in dâr inne .
0,1020 daz dienst sô ringe .
0,1021 daz er sô samfte tæte .
0,1022 nihtes er in bæte .
0,1023 wan daz er wære gehôrsam .
0,1024 hête got des niht getân .
0,1025 sô hête er den oberesten kôre .
0,1026 geminneret sîn êre .
0,1027 diu dem niderestem was getân .
0,1028 ob er geschaffen wolte hân .
0,1029 mennischlich geslehte .
0,1030 daz ez gevallen niene mahte .
0,1031 er hête in sînes schaden wole ergetzet .
0,1032 wan er was besetzt .
0,1033 mit vrîn bûwæren .
0,1034 êr . er gestüende lære .
0,1035 wie mügen wir daz gearnet haben .
0,1036 daz wir sô hôch wæren komen .
0,1037 daz der zehende kôre .
0,1038 der obereste wære .
0,1039 uns ze heimuote gegeben .
0,1040 daz wir dâ solten iemer leben .
0,1041 den engeln gelîche .
0,1042 die dâ vile vrîlîche .
0,1043 hêten ire selber kûre .
0,1044 und in dâ niht salten vûre .
0,1045 si en wolten gotes willen tuon .
0,1046 umbe daz gap er uns den vrîtuom .

0,1047 ob wir sam tæten .
0,1048 daz wir gelîchez reht hæten .
0,1049 ze sînem rîche .
0,1050 er hête ouch wærlîche .
0,1051 wider die engel getân .
0,1052 die im dankes wolten bestân .
0,1053 nû hât er ez alle bewart .
0,1054 daz ir mit ire volleist vart .
0,1055 in den oberesten kôr .
0,1056 daz sancte Pêter dâr in vuor .
0,1057 daz en dûhte sancte Michael niht unbillich .
0,1058 wan ire zweier arbeit wâren ungelîch .
0,1059 dô der genædige got .
0,1060 alsô bedâhte sîn lop
0,1061 umbe unser êwigez heil .
0,1062 und dô der engel ein teil .
0,1063 geviel von sînem rîche .
0,1064 dô volget er guotlîche .
0,1065 dem râte sîner wîsheit .
0,1066 niht langer er entbite .
0,1067 als er den kôr læren sach .
0,1068 williclîchen er dô sprach .
0,1069 “einen mennischen sulen wir schepfen .
0,1070 den val dâ mit ersetzen .
0,1071 den die engel hânt getân .
0,1072 daz si die selben wünne hân .”
0,1073 dô geschuof got von himele .
0,1074 nâch sîn selbes bilede .
0,1075 unsern vater Adâmen .
0,1076 ze michelen genâden .
0,1077 und ze michelem heile .
0,1078 ûz einem bloedem leime .
0,1079 er blies im sînen geist in .
0,1080 daz er êwic solte sîn .
0,1081 die vûnv sinne er im gap .
0,1082 decheines dienestes er in bat .
0,1083 wan daz er gerne tæte .
0,1084 er gap im heimuote .
0,1085 in dem paradîse .
0,1086 daz er ze iegelicher wîse .
0,1087 mit den engeln loben solte .
0,1088 daz er in dâ vore wolte .
0,1089 allrêreste schepfen .
0,1090 und denne dâr in setzen .
0,1091 daz en tet er niht âne sache .
0,1092 swie leit man uns ez mache .
0,1093 er hête ez vile tiefe bedâht .
0,1094 ez hête uns alle in nôt brâht .

0,1095 hête got der wise .
0,1096 in dem paradîse .
0,1097 der gewîhten erde genomen .
0,1098 der mennische wær ûz im selben komen .
0,1099 swaz er guotes an im vunden hête .
0,1100 daz er der gotesgüete .
0,1101 decheinen danc hête gesaget .
0,1102 von sîner vrümicheit hête er ez gehabet .
0,1103 des wæren wir doch verloren .
0,1104 hête Adâm daz obez gar verboren .
0,1105 dô der küninc sînen sun .
0,1106 gewaltic wolte tuon .
0,1107 alles des ûf der erde ist .
0,1108 dô zeigte im ez der heilige Krist .
0,1109 und sprach “ditz sî dir Adâm .
0,1110 allez sament undertân .
0,1111 niuwan einen boum mînen .
0,1112 der sol dir verboten sîn .
0,1113 dâr an izzest dû den tôt .”
0,1114 daz er uns daz obez verbôt .
0,1115 daz behielt uns allez daz guot .
0,1116 daz er uns iemer getuot .
0,1117 ze wiu tet er daz gebot .
0,1118 der vile genædige got .
0,1119 dô er daz wole versach .
0,1120 daz Adâm zebrach .
0,1121 und sich dâr an verworhte .
0,1122 er ne tet ez umbe daz niht daz er sîn bedorfte .
0,1123 oder daz er ez ze iht wolte .
0,1124 der mennische der solte .
0,1125 mit dem wênigem gebote .
0,1126 sich sô haben gelîcht got .
0,1127 daz er dâr nâch wære .
0,1128 gevüeret über die niun koere .
0,1129 die der vrîn engel vol sint .
0,1130 er tet ez ouch durch ein ander dinc .
0,1131 daz uns michel nützer was .
0,1132 wan ez wole wesse daz .
0,1133 daz im der hêrre Adâm .
0,1134 niemer sô gehôrsam .
0,1135 würde an decheinem gebote .
0,1136 dô daz unser hêrregot .
0,1137 vile wole besach .
0,1138 daz des dechein rât was .
0,1139 der mennische der entviele .
0,1140 dô riet im diu liebe .
0,1141 die er ze uns hête .
0,1142 daz er dem tiuvel stat tete .

0,1143 daz er mennischlich geslehte .
0,1144 wole gevellen mahte .
0,1145 ob wir im widerstên wolten .
0,1146 daz wir haben solten .
0,1147 ze varn deste bezzer reht .
0,1148 über die engel die niht an vehte .
0,1149 wan ire eigen hôchvart .
0,1150 diu in ouch ze leide wart .
0,1151 und ob uns der tiuvel betrüge .
0,1152 zuo dem valle mit sîner lüge .
0,1153 der uns doch dâ kûmftic was .
0,1154 daz wir mohten deste baz .
0,1155 gewinnen die widervart .
0,1156 allen wîse hât er uns bewart .
0,1157 wær Adâm gevallen .
0,1158 durch sînen muotwillen .
0,1159 âne schüntunge .
0,1160 unser decheiner der gewünne .
0,1161 niemer gotes hulde .
0,1162 daz der engel schulde .
0,1163 âne schüntunge ergie .
0,1164 des verwarf er alzoges die .
0,1165 iemer êwiclîche .
0,1166 von sînem himelrîche .
0,1167 an aller der geschepfede .
0,1168 die got geschuof mit sîner krefte .
0,1169 durch mennischengeslehte .
0,1170 dâr under er ne mahte .
0,1171 niht vinden sô getânes .
0,1172 daz dem hêrren Adâmes .
0,1173 iener wære gelîch .
0,1174 ez ne wær im ungeliclich .
0,1175 dô sante er im den slâf an .
0,1176 ein rippe er von im nam .
0,1177 dâr ûz schuof er ein wîp .
0,1178 diu zwei solten wesen ein lîp .
0,1179 dô Adâm erwachete .
0,1180 dô saz er und lachete .
0,1181 vroelîchen er dô sprach .
0,1182 als er daz wîp ane sach .
0,1183 “wole dir hêrre dû bist guot .
0,1184 daz ist mînez vleisch und mînez bluot .
0,1185 und mînez gebeine .
0,1186 ungerne was ich eine .”
0,1187 dô hiez er Even daz wîp .
0,1188 diu uns allen doch sît .
0,1189 half ze grôzer nôt .
0,1190 durch des tiuvels rât .

0,1191 disiu rede ist wunderlich .
0,1192 si ist iedoch der wârheit gelîch
0,1193 iedoch hât einer dâr von geschriben .
0,1194 er ne werde widertriben .
0,1195 von eteswem sîner worte .
0,1196 daz uns betruobet harte .
0,1197 wes jihet er dâr umbe .
0,1198 er quiut daz si got in einer stunte .
0,1199 beschuof beidiu ensamet .
0,1200 daz ir enwederz kom in sîn hant .
0,1201 und er hiez vüre beidiu Adâm .
0,1202 daz gît dirre rede einen michel arcwân .
0,1203 die wir dâ vore haben gesaget .
0,1204 swer den strît habe gehabet .
0,1205 sô volgen wir dem buochstabe .
0,1206 der ez sus her brâht habe .
0,1207 der dâ wile daz Adâm .
0,1208 dô got daz wîp von im nam .
0,1209 sô wîse wære .
0,1210 daz er ir den namen gæbe .
0,1211 und aller der geschefte .
0,1212 die got mit sîner krefte .
0,1213 im hête gemachet undertân .
0,1214 vile dicke ich vernomen hân .
0,1215 von wole gelêrten pfaffen .
0,1216 er habe den man zwier geschaffen .
0,1217 und daz wîp drî stunte .
0,1218 sô tet mir mîn meister kunt .
0,1219 daz sulet ir alsô verstân .
0,1220 êr der hêrre Adâm .
0,1221 ie gebiledet wûrde .
0,1222 dô geschuof got ein erde .
0,1223 und ûz der erde den man .
0,1224 zwei geschepfede wâren dô getân .
0,1225 dô was daz diu dritte .
0,1226 daz er dem manne nam ein rippe .
0,1227 dâr ûz machete er ein wîp .
0,1228 vüre wâr uns daz buoch seit .
0,1229 si heize – .
0,1230 nû hoeret wie si gevallen dô .
0,1231 den tiuvel müejet der nît .
0,1232 daz der man . und daz wîp .
0,1233 den stuol besitzen solte .
0,1234 dannen in sîn übermuot valte .
0,1235 dô er daz wolte wenden .
0,1236 er trûwete den man niht geschenden .
0,1237 durh daz er nâch gote gebiledet was
0,1238 vile wole sach er an im daz .

0,1239 durch daz bestuont er daz wîp .
0,1240 daz die got hête sît .
0,1241 geschaffen nâch dem manne .
0,1242 alzoges von danne .
0,1243 was er ire broede gewis .
0,1244 und versach ouch sich des .
0,1245 daz er sie deste lîhte verriete .
0,1246 daz si niht vernomen hête .
0,1247 daz im got daz obez verbôt .
0,1248 und im dâ von gehiez den tôt .
0,1249 nû stên ich an einem dinge .
0,1250 daz ich en weiz wie ich vûre bringe .
0,1251 einen strît ze einer wârheit .
0,1252 sûmlîchen pfaffen ist daz leit .
0,1253 der daz saget vûre wære .
0,1254 daz der tiuvel wære .
0,1255 in dem paradîse .
0,1256 die nû sîn sô buochwîse .
0,1257 die widerreden ez ob si megen .
0,1258 ich hôrte mînen meister reden .
0,1259 daz er in eines slangen wîse .
0,1260 kom in daz paradîse .
0,1261 zuo dem wîbe gegangen .
0,1262 der tiuvel ûz dem slangen .
0,1263 sprach ze wiu si daz lieze .
0,1264 daz si niht en æze .
0,1265 daz obez daz ir verboten was .
0,1266 dô sagete si im daz .
0,1267 daz ez ir verboten wære .
0,1268 von ire schepfære .
0,1269 wie sol disiu rede zesamene komen .
0,1270 daz ir von uns habet vernomen .
0,1271 daz si dâ niht wære .
0,1272 dâ unser schepfære .
0,1273 im daz obez verbôt .
0,1274 und daz si sich selbe âne nôt .
0,1275 hât doch sô vaste an gezogen .
0,1276 er wæne ich gar habe gelogen .
0,1277 wir wellen daz niht vûre lûge haben .
0,1278 wâr zuo solten wir ez iu danne sagen .
0,1279 sô wær ez bezzer verdaget .
0,1280 ir mohte ez der man haben gesaget .
0,1281 und gewuoc aber er ir sîn nie zuo .
0,1282 sô was ez ir wole verboten dô .
0,1283 dô daz got wolte .
0,1284 daz man . unde wîp . ein lîp wesen solte .
0,1285 der übel tiuvel was sô karc .
0,1286 der sich dâ in dem slangen barc .

- 0,1287 unz er daz wîp betôrte .
0,1288 daz er wole hôrte .
0,1289 an dem ire gekoese .
0,1290 daz ire herze was boese .
0,1291 dô sprach der tiuvel ûz der slange .
0,1292 “dir und dîn manne .
0,1293 wile ich sagen den list .
0,1294 umbe waz iu daz obez verboten ist .
0,1295 er verbôt ez dir umbe daz .
0,1296 daz im wole kunt was .
0,1297 swie schier dû sîn enbîzest .
0,1298 daz dû als drâte wizzest .
0,1299 beidiu übele und guot .”
0,1300 des wîbes getelôse muot .
0,1301 sich sâ wandelen began .
0,1302 michel wunder sie des nam .
0,1303 waz daz übel wære .
0,1304 die geistlîchen sêle .
0,1305 gap si dâr umbe .
0,1306 daz si daz ervûnde .
0,1307 ein teil si ez widersaz .
0,1308 ze dem wurme sprach si daz .
0,1309 “der uns daz obez verbôt .
0,1310 der sprach daz uns der tât .
0,1311 dâ von kûmftic wære .”
0,1312 “daz lâ dir sîn unmære .”
0,1313 sprach aber dô der slange .
0,1314 “daz redete er von danne .
0,1315 als ich dir gesaget hân .
0,1316 dû wirdest als got getân .
0,1317 swie schier dû sîn geizzest .
0,1318 vûre wâr dû daz wizzest .
0,1319 dir werdent alliu dinc kunt .”
0,1320 dô geriet aber der übel hunt .
0,1321 daz si gie . dâ si den boum sach .
0,1322 und des obezzes dâr abe brach .
0,1323 als si ez in den munt genam .
0,1324 zehant begreif sie diu scham .
0,1325 ein loup si vûre sich brach
0,1326 wan ir ûf getân was
0,1327 die sünde mit der schande .
0,1328 des si êr . niht erkante .
0,1329 daz was ir dô gewizzen .
0,1330 diu arme was enbizzen .
0,1331 ze michelen riuwen .
0,1332 der grôzen untriuwen .
0,1333 der hête si entgoleten .
0,1334 daz si komen wolte .

0,1335 über ire schepfære .
0,1336 ein bürde vile swære .
0,1337 hête si ûf sich geladen .
0,1338 als wir si noch hiute tragen .
0,1339 zehant erzeigte sich der nît .
0,1340 harte vorhte ir daz wîp .
0,1341 daz si dem manne wære .
0,1342 iermêmêr unmære .
0,1343 und erbunde im des .
0,1344 daz er dannoch was .
0,1345 reine und unschamelich .
0,1346 daz er ir würde gelîch
0,1347 durch daz verriet si den man .
0,1348 als sie der tiuvel hête getân .
0,1349 und truoc im daz obez zuo .
0,1350 vile harte erkom er dô .
0,1351 als si ez gegen im bôt .
0,1352 wan er vorhte den tôt .
0,1353 der im dâ von geheizen was .
0,1354 dô verriet in daz .
0,1355 daz si ouch niht en starp .
0,1356 wan ir daz selbe geheizen wart .
0,1357 von diu gevolget er ire bete .
0,1358 daz ouch er daz selbe tet .
0,1359 daz si hête getân .
0,1360 dô wâren si ungehôrsam .
0,1361 worden beidiu ensament .
0,1362 ein wünnlich gewant .
0,1363 hête in der tiuvel ab gezogen .
0,1364 er hête siu beidiu sament betrogen .
0,1365 dô si daz obez geâzen .
0,1366 dô muosen si lâzen .
0,1367 die wât der unschulde .
0,1368 si hêten gotes hulde .
0,1369 garlîchen verloren .
0,1370 und wole verdienet sînen zorn .
0,1371 der vile starke ûf siu ergie .
0,1372 wande er ez iemer sît entgelten lie .
0,1373 ire afterkomen alle .
0,1374 von dem selbem valle .
0,1375 wie hôch er alle die hât brâht .
0,1376 die sît dâr wider habent gedâht .
0,1377 ein lützel über mittetage .
0,1378 unser hêrre dâr trat .
0,1379 ûz dem himelrîche .
0,1380 in daz paradîse .
0,1381 und suochte den man .
0,1382 an dem was gefallen sân .

- 0,1383 diu sunne des rehtes .
 0,1384 diu schulde sînes knehtes .
 0,1385 was im vile wole kunt .
 0,1386 im erbarmete daz in der übel hunt .
 0,1387 sus hête betôret .
 0,1388 daz er hête überhoeret .
 0,1389 sînes schepfæres gebot .
 0,1390 drî stunte er quat .
 0,1391 “wâ bist dû Adâm .
 0,1392 maht dû her zuo mir gân .”
 0,1393 als er ze dem drittem mâl sprach .
 0,1394 der dâ vile schuldic was .
 0,1395 wider sînen hêrren .
 0,1396 er erschamete sich vile sêre .
 0,1397 ein loup er vûre sich brach .
 0,1398 daz eines öleboumes was .
 0,1399 dâ er engegen im gie .
 0,1400 er sprach “hêrre ich bin hier .
 0,1401 dô ich dîne stimme vernam .
 0,1402 dô begreif mich diu scham .”
 0,1403 des antwurte der wâre Krist .
 0,1404 “wâ von weist dû waz scham ist .
 0,1405 hâst dû daz obez gâz .”
 0,1406 vile wole ez im gewizzen was .
 0,1407 doch vrâgete er sîn umbe daz .
 0,1408 daz diu sîne güete .
 0,1409 gerne vernomen hête .
 0,1410 ob er riuwe wolte haben .
 0,1411 der armer begunde sich entsagen .
 0,1412 den schilt er vûre sich bôt .
 0,1413 dâ mit koufete er uns den tô .
 0,1414 und verlôs uns gotes hulde .
 0,1415 alle sîne schulde .
 0,1416 wolte er ûf got haben gezogen .
 0,1417 er sprach “mich hât daz wîp betrogen .
 0,1418 die dû mir hêrre gæbe .”
 0,1419 rehte als ob er spræche .
 0,1420 “ich wile vile unschuldic sîn .
 0,1421 daz dû mir gæbe daz wîp des sint die schulde dîn .”
 0,1422 der genædige got .
 0,1423 ze dem wîbe dô quat .
 0,1424 “wes riete dû daz dem manne .”
 0,1425 si sprach daz ir ez diu slange .
 0,1426 hête gerâten .
 0,1427 dô sprach er alsô drâte .
 0,1428 “der müeze ze unlüsten .
 0,1429 gên ûf den brüsten .
 0,1430 hinnenvûre ûf der erde .

- 0,1431 diu vîntschafft diu werte .
0,1432 under wîben und under slangen .
0,1433 und muoz ouch vile lange .
0,1434 under in zwein gestên .
0,1435 swâ einander widergên .
0,1436 dâ râment die slangen .
0,1437 mit zagel und mit zungen .
0,1438 dem wîbe der versene .
0,1439 und ob der wurm werde .
0,1440 gerüeret von dem wîbe daz geloubet .
0,1441 mit der versene an daz houbet .
0,1442 sâ ze stat lige er tôt .”
0,1443 noch ist ez als ez got gebôt .
0,1444 êr was der slange .
0,1445 daz ist uns gesaget lange .
0,1446 ein vile hêrlich geschafft .
0,1447 und hête die kraft .
0,1448 daz er ûfrehter gie .
0,1449 vüre daz er den vluoch entvie .
0,1450 dô lac er ûf dem bûche .
0,1451 zesamene gelochen .
0,1452 dô er sich an dem wurme gerach .
0,1453 zuo dem wîbe er dô sprach .
0,1454 “ich gemanicvaltige dînez leit .
0,1455 dû muost leiden arbeit .
0,1456 hinnenvüre iemermêre .
0,1457 dînez kint gebirest dû mit sêre .
0,1458 under dem gewalte dînes mannes .”
0,1459 zuo Adâme sprach after des .
0,1460 “vervluochet sî diu erde .
0,1461 in dînem werke ze unwerde .
0,1462 diu muoz dir gebern .
0,1463 distel . und dorn .
0,1464 hinnenvüre dû müezest .
0,1465 swaz sô dû nützezt .
0,1466 mit sweize gewinnen .
0,1467 ob dû dînes wîbes stimmen .
0,1468 mêt hâst gehôrsamet denne mir .
0,1469 nû setze ich die arbeit dir .
0,1470 unz dû ze einer erde .
0,1471 werdest unwerdere .
0,1472 dû bist ein erde unde ein stoup .
0,1473 dâr zuo muost dû werden ouch .”
0,1474 ô wê . wie er sich rach .
0,1475 ze leide er im dô sprach .
0,1476 “nû ist worden Adâm .
0,1477 als unser einer getân .”
0,1478 dô sprach er umbe daz .

0,1479 daz er dâr umbe was .
0,1480 worden ungehòrsam .
0,1481 daz er würde getân .
0,1482 als sîn schepfære .
0,1483 wir verstên daz diu rede wære .
0,1484 gesprochen in schimpfewîse .
0,1485 vüre daz paradîse .
0,1486 er siu beidiu sament stiez .
0,1487 einen engel er dô hiez .
0,1488 der was geheizen Cherubîn .
0,1489 daz er sie dâr wider in .
0,1490 decheinen wîse iht lieze .
0,1491 er sprach ob er geæze .
0,1492 daz obez daz des lebenes wære .
0,1493 daz er danne wære .
0,1494 iermêmêr untôtlich .
0,1495 daz was diu vile gelîch .
0,1496 als ob im erbarmete .
0,1497 ob der mennische in der noete .
0,1498 iermêmêre ligen solte .
0,1499 und daz er ez niht en wolte .
0,1500 ez wær uns gewisse ein michel nôt .
0,1501 erlôste unser sêle der tôt .
0,1502 ûz disem ellende niht .
0,1503 wan in daz êwige licht
0,1504 gebiret er die rehte .
0,1505 swie harte wir in vürhten .
0,1506 die türe man bewarte .
0,1507 mit einem viurînem swerte .
0,1508 unz ez der schâchær danne huop .
0,1509 des tages dô got sîn bluot .
0,1510 an dem kriuze ûz gôz .
0,1511 dâ er uns die porten mit entslôz .
0,1512 als si uns hiute offen stât .
0,1513 einer iegelîchen sêl diu gerne dâr in gât .
0,1514 wir giengen alle gerne dâr in .
0,1515 dâ muoz aber mêr bî sîn .
0,1516 denne ein alsô rîchelîche ganc .
0,1517 den stouf den er dô hier transc .
0,1518 der genædige Krist .
0,1519 ob uns daz erbe liep ist .
0,1520 des muoz wir alle bekoren .
0,1521 oder wir haben ez iemer verloren .
0,1522 nû mac iu wole erbarmen .
0,1523 daz dem vile armen .
0,1524 dem êr . nihtes gebrast .
0,1525 und dem diu genuhtsame was .
0,1526 gegeben aller dinge .

0,1527 daz er muose gewinnen .
0,1528 mit dem sînem sweize .
0,1529 kûmem und ageleize .
0,1530 daz er . ernerte den lîp .
0,1531 er ervunde daz vile wole sît .
0,1532 der tiuvel der in dâ betrouc .
0,1533 daz er vile gar louc .
0,1534 er gehiez im übelez und guot .
0,1535 der hête er vile und genuoc .
0,1536 beider erkunnet .
0,1537 einen sun si gewonnen .
0,1538 den hiezen si Kâin .
0,1539 er muose in wole sîn .
0,1540 in den zîten vile liep .
0,1541 doch er übel geriet .
0,1542 gote lobeten si umbe den sun .
0,1543 schier gewonnen si einen dâr zuo .
0,1544 den hiezen si Abêle
0,1545 dô si gote bêde .
0,1546 after manigen tagen dannen .
0,1547 ire opfer solten bringen .
0,1548 Abel was ein guot man .
0,1549 ûz allem sînem vihe er nam .
0,1550 daz allerbezzeste lamp .
0,1551 daz er iener dâr under vant .
0,1552 gote er daz brâhte .
0,1553 jener wirs gedâhte .
0,1554 der dâ alter was .
0,1555 sîne garbe er überdrasch .
0,1556 dô er sie gote wolte bringen .
0,1557 dem wir dâ niht verhelen megen .
0,1558 ire beider herze er an sach .
0,1559 dem einem er dô zuo sprach .
0,1560 sô uns diu schrift kûndet .
0,1561 “Kâin dû hâst gesûndet .
0,1562 des sol in gestillen .
0,1563 dînes bruoderes willen .
0,1564 kumet vile hôher über dich .
0,1565 des opfer entvâhe ich .”
0,1566 daz was Kâin leit .
0,1567 daz got sîn opfer vermeit .
0,1568 und ze dem Abeles sach .
0,1569 vile starke er ez über im rach .
0,1570 ze tôde er in dâr umbe sluoc .
0,1571 dô gemeile daz bluot .
0,1572 die magetreinen erde .
0,1573 daz der gotes werder .
0,1574 vore sînem bruoder ûz gôz .

0,1575 daz mort was michel unde grôz .
0,1576 dô er dô gevrumete .
0,1577 die michelen sünde .
0,1578 und daz vile michel meil .
0,1579 der wære got im erschein .
0,1580 dâr nâch vile schiere .
0,1581 und vrâgete in wâ wære .
0,1582 Abel der bruoder sîn .
0,1583 des antwurte im Kâin .
0,1584 er ne wesse wâ er wære .
0,1585 ob er ein huotære .
0,1586 sînes bruoderes solte sîn .
0,1587 “waz hâst dû getân Kâin .”
0,1588 sprach der vile genædige Krist .
0,1589 dem niht verholen ist .
0,1590 “diu stimme dînes bruoder .
0,1591 rüefet vile lûte .
0,1592 bluotige her zuo mir .
0,1593 waz hête er getân dir .
0,1594 daz dû in mortlich hâst erslagen .
0,1595 diu erde diu dâ entvungen habe .
0,1596 daz bluot Abeles .
0,1597 diu müeze hinnenvüre des .
0,1598 iemermêr vervluochet sîn .”
0,1599 dô sprach der arme Kâin .
0,1600 “mîner sünde ist sô vile .
0,1601 daz ich en getar noch en wile
0,1602 niemer gesinnen .
0,1603 daz ich antlâz gewinne .
0,1604 sô grôz ist mînez unreht .
0,1605 hiute wirde ich armer kneht .
0,1606 verworfen hêrre von dir .
0,1607 nû weiz ich hêrre daz ez mir .
0,1608 âne zwîvel muoz ergân .
0,1609 sît ich dîne hulde verloren hân .
0,1610 swâ ich nû gên eine .
0,1611 ûf der wilden heide .
0,1612 dâ erslahe mich mînez eigen künne .”
0,1613 dô sprach diu gotes stimme .
0,1614 “daz wære mir niht liep .
0,1615 doch widerrede ich ez niht .
0,1616 dir en werde vile wê .
0,1617 ûf der erde diu in entvie .
0,1618 dînes bruoderes Abeles bluot .
0,1619 und ist aber iemannd der ez tuot .
0,1620 des leit sibenvaltige ich .
0,1621 swer sô erslehet dich .”
0,1622 âne sache sol ez niht sîn .

- 0,1623 daz der arme Kâin .
0,1624 vervluochet von gote was .
0,1625 daz er doch disiu wort sprach .
0,1626 swer sô in erslüege .
0,1627 daz über den müese .
0,1628 sô michel râche ergân .
0,1629 dâr an mügen wir verstân .
0,1630 daz er des niht en wile .
0,1631 daz iemannd den andern sô vile .
0,1632 ze leide getân habe .
0,1633 daz er in durh daz erslahe .
0,1634 vile gerihtes wile er selbe pflegen .
0,1635 und daz wir einander vergeben .
0,1636 der armer schiet dannen .
0,1637 sô wart er bevangen .
0,1638 mit der missetriuwe .
0,1639 daz er rehten riuwe .
0,1640 niemer mêr gewan .
0,1641 eine kone er im genam .
0,1642 ze mêren daz geslehte .
0,1643 eteswer nû mehte .
0,1644 vrâgen wâ wære dannoch daz wîp .
0,1645 dâ was ez ein vile lange zît .
0,1646 von Kâines gebürte .
0,1647 êr . von im würde .
0,1648 sîn bruoder Abel geboren .
0,1649 ez mohte werden geboren .
0,1650 vile manic mennische under diu .
0,1651 wande Adâm driu .
0,1652 und sechzige kint gewan .
0,1653 der wâren driu und drîzic manne .
0,1654 daz ander wâren allez wîp .
0,1655 die gewan er êr . und ouch sît .
0,1656 sô diu schrift in genuogen steten wile .
0,1657 der buoche ist ouch vile .
0,1658 die der zal niht en habent .
0,1659 als uns die buochstabe sagent .
0,1660 daz hât nû dirre buochstap .
0,1661 daz Adâm vile manigen tac .
0,1662 after diu wære .
0,1663 mit leide . und mit sêre .
0,1664 sô harte bevangen .
0,1665 daz er von dannen .
0,1666 alzoges sîne kone mit .
0,1667 sô unmæziclichen leide .
0,1668 was im der Abeles tôt .
0,1669 unz im got verbôt .
0,1670 sînen sun er im wole galt .

- 0,1671 dô er hundert jâr alt .
0,1672 wart . dô gewan er daz bezziste kint .
0,1673 daz er êr . oder sint .
0,1674 ie . gewinnen möhte .
0,1675 von des geslehte .
0,1676 wart der gotessun geboren .
0,1677 und verswende den zorn .
0,1678 den got ze dem mennischen ie gewan .
0,1679 er wart ein vile sæliger man .
0,1680 den hiezen si Sethen .
0,1681 vile michel vröuwede si hêten .
0,1682 after des lebet Adâm .
0,1683 unz er in gewan .
0,1684 ahte hundert jâr .
0,1685 daz sage ich iu vüre wâr .
0,1686 einen sun er dô gewan .
0,1687 sam der verworhter man .
0,1688 den hiez er Enoch .
0,1689 ein stat er im kôs .
0,1690 durch des kindes liebe .
0,1691 dô zimberte er schiere .
0,1692 ein burc lustsam .
0,1693 die hiez er alsam den sun .
0,1694 des wænen wir allerbezzeste .
0,1695 daz wære diu êrste veste .
0,1696 diu ûf der erde ie gelac .
0,1697 dâr nâch lebet er manigen tac .
0,1698 Kâin der verworhter man .
0,1699 unz er einen sun gewan .
0,1700 der hiez Gîrât .
0,1701 sô ez der buochstabe hât .
0,1702 von des kindes kinde .
0,1703 wart daz unbilede .
0,1704 an Kâin errochen .
0,1705 von dem wart er erschozzen .
0,1706 der hiez Lamech .
0,1707 got im die gâbe verlêch .
0,1708 daz er mit dem bogen wole schôz .
0,1709 unz er vore alter verlôs .
0,1710 vile harte sîn licht .
0,1711 er tet ez sînes dankes niht .
0,1712 daz er Kâin erschôz .
0,1713 vüre ein tier er in kôs .
0,1714 dô er in einem buschn saz .
0,1715 als im von gote erteilet was .
0,1716 wie mohte daz sîn .
0,1717 daz der arme Kâin .
0,1718 sînem sune ein burc worhte .

- 0,1719 dô er im sô harte vorhte .
0,1720 vüre daz er den vluoch entvie .
0,1721 daz er iermêre gie .
0,1722 in dem stûdehe .
0,1723 daz in iemannd sæhe .
0,1724 von dem er würde erslagen .
0,1725 si mohten wole holz haben .
0,1726 und wâren die liute sô starc .
0,1727 daz man schiere michel werc .
0,1728 dâr mit vüre kêrte .
0,1729 als in eteswer lêrte .
0,1730 sô mohte ez wole vrumen sîn wîp .
0,1731 nû kürzen wir ez enzît .
0,1732 wir mügen ez allez niht gesagen .
0,1733 genuoc müezen wir sîn verdagen .
0,1734 die dô wurden geboren .
0,1735 vile sêre si den goteszorn .
0,1736 tagelîchen koufeten .
0,1737 unz er muose besiuften .
0,1738 in der sinvlüete .
0,1739 mit maniger ungüete .
0,1740 triben si in dâr zuo .
0,1741 daz in muose riuwen dô .
0,1742 daz er den mennischen ie geschuof .
0,1743 ein rehter man dô wuohs .
0,1744 in Sethes geslehte .
0,1745 der wart durhnehte .
0,1746 mit allen sînen siten guot .
0,1747 sîn sich ouch ane huop .
0,1748 wole in manigen enden hier .
0,1749 wan got mit im manige wunder begie .
0,1750 er was geheizen Nôê .
0,1751 dô daz wazzer vile wê .
0,1752 tet allem dem daz dâr was .
0,1753 vile wole er genas .
0,1754 sîner güete er niht entgalt .
0,1755 dô er wart vûnv hundert jâr alt .
0,1756 der got liebe man .
0,1757 drî süne er gewan .
0,1758 der hiez einer Cham .
0,1759 der ander hiez Sem .
0,1760 der dritte hiez Jâphêt .
0,1761 von in allen drîn stêt .
0,1762 michel wunder geschriben .
0,1763 wie siu got wolte geviden .
0,1764 mit veterlîcher güete .
0,1765 in der sinvlüete .
0,1766 nû wellen wir iu mêr sagen .

0,1767 als vile sô wir mûgen .
0,1768 wie si koufeten den goteszorn .
0,1769 daz er lie werden verloren .
0,1770 alle die dâr wâren .
0,1771 wan die dâ genâren .
0,1772 in der Nôês arke .
0,1773 er rach sich vile starke .
0,1774 dô si ez brâhten dâr zuo .
0,1775 zwei geslehte wâren dô .
0,1776 daz eine hiez diu goteskind .
0,1777 si liezen in sûmlîche sint .
0,1778 des vile ûbel geniezen .
0,1779 die andern die hiezen .
0,1780 der mennischen kint .
0,1781 harte mischeten si sich sint .
0,1782 mit ire hîrâte .
0,1783 daz eine kom von Sethe .
0,1784 daz ander kom von Cham .
0,1785 den goteskinden an gewan .
0,1786 diu wîp wole getânen .
0,1787 si macheten daz si nâmen .
0,1788 kone in daz verworhtez künne .
0,1789 diu kint diu si dâ bî gewonnen .
0,1790 die verwurffen gotes gebot .
0,1791 ire schepfâres lop .
0,1792 hazzeten si vile sêre .
0,1793 die vluhen götlich êre .
0,1794 vile maniges si sich underzugen .
0,1795 dâ si sich selbe mit betrogen .
0,1796 und ouch got vermaneten .
0,1797 in allen den landen .
0,1798 wart daz unreht sô grôz .
0,1799 daz si got von rehte verlôs .
0,1800 wande er vile manic meil sach .
0,1801 durch nôt er dô sprach .
0,1802 daz sîn geist mehte .
0,1803 in der mennischen geslehte .
0,1804 gewonen niht mêre .
0,1805 in gerouw vile sêre .
0,1806 daz er siu hête geschaffen .
0,1807 des wære sô vile erwahsen .
0,1808 des niht wesen solte .
0,1809 daz er vertilgen wolte .
0,1810 allez daz dô wære .
0,1811 daz nihtesniht genære .
0,1812 diu wort sprach er Nôê zuo .
0,1813 und hiez in dô .
0,1814 und hieze in wûrken ein arke .

- 0,1815 michel . und starke .
0,1816 diu ringes holzes wære .
0,1817 dâ er selbe inne genære .
0,1818 er gap im die mâze .
0,1819 daz er sie solte lâzen .
0,1820 vünve hundert klâfter lanc .
0,1821 an der hindern want .
0,1822 hiez er lâzen die türe dâr in .
0,1823 er sprach daz si solte sîn .
0,1824 vünvzige klâfter tief .
0,1825 drîzic er hiez .
0,1826 sie lâzen vollicliche .
0,1827 stiege . und venster rîche .
0,1828 und kemenâte .
0,1829 hiez er im drâte .
0,1830 wûrken genuoge .
0,1831 er schuof daz er gevuoge .
0,1832 wole verworhte venster .
0,1833 si bestrîche mit klenstær .
0,1834 hiez er lâzen oben in .
0,1835 er sprach “der virst sol sîn .
0,1836 einer klâftern breit .”
0,1837 niht langer er dô beit .
0,1838 zweinzic jâr dâhte er dâr zuo .
0,1839 volliclichen er sie dô .
0,1840 zehenzic jâr worhte .
0,1841 wan er daz wazzer vorhte .
0,1842 und dô ez wesen solte .
0,1843 daz got erzeigen wolte .
0,1844 sînez zorn vile starke .
0,1845 dô hieze er in die arke .
0,1846 Nôêen sô vile tragen .
0,1847 daz er dâr inne mohte haben .
0,1848 wole ze einem jâre spîse .
0,1849 im gebôt ouch got der wîse .
0,1850 daz er dâr in solte nemen .
0,1851 sîne süne . und ire kone .
0,1852 er hiez in dâr in gewinnen .
0,1853 aller lebentiger dinge .
0,1854 ie . sibeniu und sibeniu .
0,1855 und sprach daz diu alliu .
0,1856 rein solten sîn .
0,1857 er hiez des unreinen drî .
0,1858 ie . zwei . und zwei setzen .
0,1859 nû liset man uns an einer letzen .
0,1860 daz diu rede geschæhe .
0,1861 vore dem sintwæge . siben tage vore und niht mêr .
0,1863 ze michelem wunder .

0,1864 müezen wir iu ez sagen nû .
0,1865 wie er diu tier alliu dô .
0,1866 sô gâhes gevienge .
0,1867 wan siu dannoch giengen .
0,1868 ûf der wilden heide .
0,1869 in vile wîte spreide .
0,1870 nû habent genuoge den strît .
0,1871 daz er langer zît .
0,1872 dâr zuo muose haben .
0,1873 daz wellen wir iu wider sagen .
0,1874 wir sulen noch en megen .
0,1875 daz niht wider reden .
0,1876 in en hülfe vile wole daz .
0,1877 daz er sîn weidegeselle was .
0,1878 der si ouch solte ernern .
0,1879 dem mohten si sich niht erwerben .
0,1880 er enttrîbe si im alliu ze hant .
0,1881 dô er siu vore der arke vant .
0,1882 dô er dô ieglichem stat .
0,1883 in der arke gegap .
0,1884 got selbe zuo slôz .
0,1885 dô wart ein weter vile grôz .
0,1886 si tâten die urspringe ûf .
0,1887 alliu wazzer giengen ûz .
0,1888 der himel vinsten gewan .
0,1889 starke ez regen began .
0,1890 vierzic tage volle .
0,1891 daz die berge alle .
0,1892 stuonden in dem wâge .
0,1893 sô tiefe ze wære .
0,1894 der der hôheste was .
0,1895 daz des niht gebrast .
0,1896 ez entgienge dâr übere .
0,1897 dâ ist niht widere .
0,1898 vünvzehenen klâfter tief .
0,1899 daz in got dâ gehiez .
0,1900 daz muose in allen volkumen .
0,1901 wir haben des niht vernomen .
0,1902 daz iht des genære .
0,1903 des ûf der erde wære .
0,1904 wan daz got dâr inne beslôz .
0,1905 vile wît diu arke vlôz .
0,1906 in der sinvlüete .
0,1907 sî truoc diu gotesgüete .
0,1908 tuo daz wazzer sîgen began .
0,1909 diu mennische wunder genam .
0,1910 die dâ genâren .
0,1911 und in der arke wâren .

- 0,1912 Nôê dô sante .
0,1913 wie ez stüende in dem lande .
0,1914 ûz ze boten einen raben .
0,1915 daz im der wider solte sagen .
0,1916 wie ez stüende in dem rîche .
0,1917 dô tet er boeslîche .
0,1918 daz er niht wider kam .
0,1919 eine tûben er dô nam .
0,1920 und sante ouch ûz die .
0,1921 diu was ein guot vogel ie .
0,1922 diu kom des selben tages widere .
0,1923 mit müedem gevidere .
0,1924 ich en weiz waz sie genære .
0,1925 oder wâ si gevlogen wære .
0,1926 si mohte sich niht gesetzen .
0,1927 si ne wolte sich netzen .
0,1928 er enthielt sich aber danne .
0,1929 siben tage lange .
0,1930 unz sich der wâc baz zeliez .
0,1931 die selben tûben er dô hiez .
0,1932 ûz varen aber sâ .
0,1933 dô vlouc si unz ich en weiz wâ .
0,1934 si einen öleboum sach .
0,1935 ein zwî si dâr ab brach .
0,1936 daz brâhte si im dô .
0,1937 des wurden si vile vrô .
0,1938 an dem zwî er wole sach .
0,1939 daz gesigen was der wâc .
0,1940 dâ si ez dâ hête gebrochen .
0,1941 dannoch beitet er ein wochen .
0,1942 unz ez baz geviele .
0,1943 wâ diu tûbe entwiele .
0,1944 oder durch waz si daz liez .
0,1945 dô er sie ze der dritten stunte hiez .
0,1946 ûz varen nâch mêre .
0,1947 si widersaget im niht mêre .
0,1948 ich en wære si sîn vergaz .
0,1949 dô si sô kaltiu gesaz .
0,1950 an die warmen sunne .
0,1951 rehte wir en können .
0,1952 iu dâr umbe niht gesagen .
0,1953 wan . dô in den selben tagen .
0,1954 niht hin wider quam .
0,1955 michel wunder in des nam .
0,1956 dô brach er obene daz dach .
0,1957 selbe er dô wole sach .
0,1958 wie ez stüende in dem lande .
0,1959 daz er got erkante .

0,1960 des hête er vile wole genozzen .
0,1961 diu arke was entslozzen .
0,1962 dô gie ûz und kras .
0,1963 allez daz dâr inne was .
0,1964 an die süezen weide .
0,1965 trucken was diu heide .
0,1966 dô daz wazzer vervlôz .
0,1967 und got die arke entslôz .
0,1968 dô schuof der heilige Krist .
0,1969 dem spîse . und und wist .
0,1970 den dâ sîne güete .
0,1971 unz her ernerte hête .
0,1972 er hiez im bûwen die erde .
0,1973 daz im dâr ûf würde .
0,1974 genuhtsame alles guotes .
0,1975 und hiez im des bluotes .
0,1976 mit dem vleische niht ezzen .
0,1977 daz er solte wizzen .
0,1978 daz des vihes sêle .
0,1979 in dem bluote wære .
0,1980 und alle die ez ezzen wolten .
0,1981 die muosen im die sêl gelten .
0,1982 dô hête dem hêrren Nôê .
0,1983 daz wazzer getân sô wê .
0,1984 daz er niht wolte bûwen .
0,1985 er mohte des niht getrûwen .
0,1986 daz ez mit vride wære .
0,1987 vore dem sintgewæge .
0,1988 diu werlt iemermêre .
0,1989 dô gehiez im unser hêrre .
0,1990 und muoz ez halt vile vaste loben
0,1991 dô sante er im den regenbogen .
0,1992 ze einem urkünde .
0,1993 daz er mit wâges ûnde .
0,1994 die werlt niemer mêt verlûr .
0,1995 als dicke als er daz zeichen kôs .
0,1996 daz er dâr an gedæhte .
0,1997 daz er im geheizen hæte .
0,1998 daz er uns mit der sinvluot .
0,1999 niemer mêt leit getuot .
0,2000 ouwê der heilige Krist .
0,2001 wie vollicliche er doch guot ist .
0,2002 daz er sô pflege sînen schalc .
0,2003 wie vlizicliche er im bevalch .
0,2004 daz er worhte ein altære .
0,2005 und im dâr ûf gæbe .
0,2006 alles sînes guotes teil .
0,2007 dô huop sich êrste daz heil .

- 0,2008 daz man kirechen bûwen began .
0,2009 Nôê . was gehôrsam .
0,2010 als verre sô er kunde .
0,2011 bûwen er begunde .
0,2012 er pflanze wîngarten .
0,2013 dô die ze nutze wurden .
0,2014 durch den seltsæne smac .
0,2015 sô man si wole ziehen mac .
0,2016 und iz diu schrift in genuogen steten wile .
0,2017 dô tranc er eines tages sô vile .
0,2018 daz ez im den rehten sin benam .
0,2019 und daz den guoten man .
0,2020 der slâf sô vaste begreif .
0,2021 daz sîn wât von im entsleif .
0,2022 daz er schamelîchen lac .
0,2023 sîn sun Cham daz ersach .
0,2024 er wolte in niht wecken .
0,2025 er wolte ouch in niht decken .
0,2026 er wolte ez ouch niht verdagen .
0,2027 sunder er wolte sagen .
0,2028 sînes vateres schande .
0,2029 sînen bruoder er besante .
0,2030 daz si daz muosen sehen .
0,2031 wie ire vater wære geschehen .
0,2032 daz tet er im ze leide .
0,2033 si dahten in beide .
0,2034 vile getriuwelîchen .
0,2035 und als im begunde wîchen .
0,2036 diu trunkenheit ungemach .
0,2037 dô wesse er wole dâr nâch .
0,2038 wie si hêten getân .
0,2039 er sprach “mein sun Cham .
0,2040 der müeze sîner brüeder eigen sîn .
0,2041 die dâ bedahten die schame mîne .”
0,2042 von den wurden die schalke geboren .
0,2043 wan si hêten wole gearnet sînen zorn .
0,2044 nû wellen wir iu einez dâr under sagen .
0,2045 daz wir iu dâ vore bewaret haben
0,2046 mit manigen urkünden
0,2047 dâ wile ich ze disen stunten
0,2048 sûmlîchez her wider reden .
0,2049 wir en sulen noch en megen .
0,2050 des niht gelouben .
0,2051 daz mit vleischlîchen ougen .
0,2052 ie dechein man sæhe got .
0,2053 weder dô er diu wort wider Nôê quat .
0,2054 oder iener an decheiner stete .
0,2055 die rede die er mit Adâm tet .

0,2056 in dem paradîse .
0,2057 und mit Kâin dem unwîsen .
0,2058 und mit Abêlen .
0,2059 daz was niht mêre .
0,2060 wan daz ein engel im erschein .
0,2061 nie gesach iuwer dechein .
0,2062 – und Enoch .
0,2063 die er dâr zuo zôch .
0,2064 daz er siu noch bêde .
0,2065 mit lîbe und mit sêle .
0,2066 hât behalten swâ er wile .
0,2067 die en gesâhen in nie als vile .
0,2068 dô oder sît .
0,2069 Abraham und Dâvît .
0,2070 die gesâhen in nie .
0,2071 solte in iemannd sehen hier .
0,2072 daz hête Moses getân .
0,2073 von dem ich wole vernomen hân .
0,2074 daz er inen vlîziclîchen bat .
0,2075 dô er im die êwe . gap .
0,2076 daz er sich in sehen lieze .
0,2077 nû sprichet daz buoch er hieze .
0,2078 in hinder einen stein stên .
0,2079 dô er gâhes vuor wolte gên .
0,2080 daz er nâch im sâhe .
0,2081 daz buoch sprichet daz im got verjæhe .
0,2082 in en mohte niemannd gesehen .
0,2083 im en muose dâ von leit geschehen .
0,2084 daz tet der hêrre Moses .
0,2085 sîne varwe verlôs er des .
0,2086 und wart sô rehte liehte .
0,2087 von der selben gesihte .
0,2088 daz von im gie ein schîne .
0,2089 sam zwei horn viurîn .
0,2090 obe im dâ von geschach .
0,2091 daz er nie niht en sach .
0,2092 wan einen blic durch einen stein .
0,2093 nû werdet rehte des enein .
0,2094 waz dem wære geschehen .
0,2095 der ganzlîchen hête gesehen .
0,2096 alle sîne magenkraft .
0,2097 wærlîche die en gesach .
0,2098 sancte Pêter noch nie .
0,2099 weder dort noch hier .
0,2100 er ne getuot . noch nie getet .
0,2101 êr . als mankünne erstêt .
0,2102 si sehent in denne michel baz .
0,2103 denne die engel geloubet daz .

0,2104 die in dâ iemer sulen loben .
0,2105 als in die übel habent erzogen .
0,2106 alsô sehent si in dâ .
0,2107 nû mohte eteswer sprechen wâ .
0,2108 si dô ie wæren .
0,2109 daz si sîn niht sæhen .
0,2110 sîne trûte alle .
0,2111 der daz ervinden welle .
0,2112 der vorsche nâch der stete .
0,2113 dâ von sancte – ein rede tet .
0,2114 der grôze lêrære .
0,2115 daz er ez selbe wære .
0,2116 des zôch er sich niht an .
0,2117 er sprach er wesse einen man .
0,2118 der dâr gevüeret wære .
0,2119 dâ er hôrte und sæhe .
0,2120 sô getâne wünne .
0,2121 von der mennischen zunge .
0,2122 niht mohte gesagen .
0,2123 dâ mügen si sich wole zuo haben .
0,2124 die dâr nâch vrâgent hier .
0,2125 daz aber er des ie .
0,2126 iemanndn verjæhe .
0,2127 daz er got selben sæhe .
0,2128 des haben wir niht vernomen .
0,2129 die dâr sint komen .
0,2130 die sint vile wole behalten dâ .
0,2131 und ouch anderswâ .
0,2132 in dem gotesrîche .
0,2133 dâ er selbe tagelîche .
0,2134 ist ire vuore . und ire vröuwede .
0,2135 in sîner beschöuwede .
0,2136 dâ mendent si sich inne .
0,2137 sô si jene her nâch sulen gewinnen .
0,2138 sô habent si sîn noch niht gesehen .
0,2139 swer iht anders dâr umbe wile jehen .
0,2140 des antwürtet wir im enzît .
0,2141 sô wir vernemen sînen strît .
0,2142 er hât ein tiefe rede getân .
0,2143 ze diu daz er uns benenne den man .
0,2144 der dâ tihtet daz liet .
0,2145 er ne tæte sîn vürenamens niht .
0,2146 er ne wesse wole die wârheit .
0,2147 der elliu rehtiu buoch dâ schreip .
0,2148 mit dem wile er ez behaben .
0,2149 und wile dâr über sagen .
0,2150 manic – .
0,2151 daz der wære gotessun .

0,2152 von dem selben dinge sprach .
0,2153 dô er mennische hier in erde was .
0,2154 daz uns michel helfe gât .
0,2155 in genuogen steten in bat sît .
0,2156 – dâr von geredet .
0,2157 dâ bî ir wole meget .
0,2158 die wârheit erkennen .
0,2159 daz er denne .
0,2160 vile wole vindet .
0,2161 ob sich iemannd underwintet .
0,2162 decheines strîtes dâr umbe .
0,2163 iedoch wile ich nû ze stunte .
0,2164 iu des ein teil sagen .
0,2165 wie daz kumet daz si niht en megen .
0,2166 gesehen den heiligen Krist .
0,2167 die doch sint dâ er dâ ist .
0,2168 dâ ze himel ist niemann gar .
0,2169 êr . ouch der lîp kumet dar .
0,2170 der dannoch hiew in erde ist .
0,2171 als den unser hêrre Krist .
0,2172 wider gât der sêle .
0,2173 sô sehent si in iermêre .
0,2174 ze gesichte ze gesichte .
0,2175 und sehent in algerihten .
0,2176 als er uns nû tuot .
0,2177 dannoch habent si sînez guot .
0,2178 niht ze voller beschöuwede .
0,2179 wan sich mêret ire vröuwede .
0,2180 von tagen . ze tagen .
0,2181 sô hoeren wir daz buoch sagen .
0,2182 der nû gerne hüebe einen strît .
0,2183 der spræche “sô sâhen si in iemer sît .
0,2184 die mit im erstuonden von dem grabe .
0,2185 an dem sæligem tage .
0,2186 dô der gotessun erstuont .”
0,2187 nein en ze wâr noch en tuont .
0,2188 wan sâhen in die wole .
0,2189 sô weiz ich ze wiu daz buoch sol .
0,2190 dâ man uns abe hât gelernet .
0,2191 daz die engel tagelîchen gernt .
0,2192 die sehen iu schepfære .
0,2193 wærlîchen und wære .
0,2194 der iemannd dâ mit volkomen .
0,2195 sô wær diu giredede gar benomen .
0,2196 sancte Michaële .
0,2197 wan er ist vile hêre .
0,2198 im ist got vile liep .
0,2199 in sehent die engel . unde sehent sîn niht .

- 0,2200 ouwî wie kumet daz .
0,2201 der ie in einem gademe was .
0,2202 der en gesach ez ûzen nie .
0,2203 alsô habet iu umbe die .
0,2204 die in gote sint .
0,2205 er gewan nie sô liebez kint .
0,2206 daz im sô liep wære .
0,2207 daz ez ie gesæhe .
0,2208 alle sîne magenkraft .
0,2209 wan er ist unendehaft .
0,2210 alliu dinc er . ervûllet .
0,2211 unz er uns umbehûllet .
0,2212 er ist ire gruntveste . unde ire dach .
0,2213 als sancte Johannes sprach .
0,2214 der heilige êwangeliste .
0,2215 der ûz der gotesbrûste .
0,2216 vile michelen wîstuom nam .
0,2217 daz müget ir âne wân .
0,2218 vile wole gelouben .
0,2219 wan umbe die gotes tougene .
0,2220 und von sîner goteheit .
0,2221 mê niemand tiefer geseit .
0,2222 der wile des vaste jehen .
0,2223 daz er noch sî ungesehen .
0,2224 und gelouben ez ouch wole dâ bî .
0,2225 daz unser decheiner sî
0,2226 der des mit mir müge gejehen .
0,2227 daz er den andern habe gesehen .
0,2228 sehen wir den andern an dem vleische .
0,2229 wir sehen niemandn an dem geiste .
0,2230 disiu rede ist tief und swære .
0,2231 niemand en wære .
0,2232 der mit sînen sinnen .
0,2233 mohte vüre bringen .
0,2234 an die goteslêre .
0,2235 noch redeten wir gerne mêre .
0,2236 von dem anege .
0,2237 wan ich vorhte ez dunke iu ze lenge
0,2238 als ez ouch wole mehte .
0,2239 wan sehs und drîzic geslehte .
0,2240 von Adâmen komen wâren .
0,2241 unz an die zît ze wære .
0,2242 daz got mennische wart .
0,2243 muosen si alsament varen .
0,2244 si wæren rîche oder arm .
0,2245 si muosen ze helle .
0,2246 swen diu bechwelle .
0,2247 dâ niht volliclîchen dwanc .

0,2248 der muose rouch und stanc .
0,2249 und dâr zuo die vinster tragen .
0,2250 daz wir iu dâ wellen sagen .
0,2251 dâ hoeret vlîziclichen zuo .
0,2252 wie der wâre got dô .
0,2253 uns dem tiuvel an gewünne .
0,2254 eine samenunge .
0,2255 diu gotes erbermede gesprach .
0,2256 wan si vile ungerne sach .
0,2257 unser êwigez leit .
0,2258 dâ widervuor diu wârheit .
0,2259 der erbermede und der güete drâte .
0,2260 nû sâzen si ze râte .
0,2261 umbe den mennischen der dâ was verloren .
0,2262 ûf hôher stuont der goteszorn .
0,2263 unz uns genâde geschach .
0,2264 diu erbermede dô allrêreste sprach .
0,2265 “hei gewalt . und wîstuom .
0,2266 wende mûgen wir daz widertuon .
0,2267 und den mennischen der dâ verloren ist .
0,2268 nû gedenke daz dû ez got bist .
0,2269 gewin in wider eteswie .
0,2270 der dem tiuvel hât gedienet ie .
0,2271 daz er êwiclich iht verloren sî .
0,2272 den wir haben geschaffen vrî .
0,2273 wan er hât michel leit .”
0,2274 des antwürtet im diu wârheit .
0,2275 si sprach “mich dunket âne gedinge .
0,2276 solte er gewinnen .
0,2277 von helle die widervart .
0,2278 dem von uns geheizen wart .
0,2279 vile wærlîchen der tût .
0,2280 dô man im daz obez verbôt .
0,2281 unseriu wort mûezen wâr sîn .
0,2282 und solte doch die hantgetât dîne .
0,2283 niht lâzen underwegen .
0,2284 wer sint die geslâfen megen .
0,2285 und niemer erwachent .
0,2286 einen mennische mûgen wir machen .
0,2287 reine ûz der erden .
0,2288 der eteswenne werde .
0,2289 umbe den mennischen gegeben .”
0,2290 dô sprach diu wârheit “wir en megen .
0,2291 des tages dô Adâm .
0,2292 wart ungehòrsam .
0,2293 dô wart vervluochet diu erde .
0,2294 in sînem werke ze unwerde .
0,2295 daz mac niht werden widertân .

0,2296 alliu dinc ich lîhter hân .
0,2297 ûz nihte geschaffen .
0,2298 danne daz ich wider mache .
0,2299 den mennischen als er êr was .”
0,2300 “nû weist dû vile wole daz .”
0,2301 sprach aber diu erbermede .
0,2302 “ob durch Adâmes gernede .
0,2303 vervluochet wær diu erde .
0,2304 in sînem werke ze unwerde .
0,2305 daz in unserm werke niht vervluochet ist .
0,2306 dû dâ gewaltic got bist .
0,2307 wilt dû im geben die widervart .
0,2308 wan er dâr zuo bedwungen wart .
0,2309 sô maht dû von der erden .
0,2310 einen mennischen heizen werden .
0,2311 dannen einer wirdet gereinet .”
0,2312 dâ mit wart diu maget gemeinet .
0,2313 diu uns daz heil brâhte .
0,2314 ouwê . wie tiefe er dâhte .
0,2315 der genædige got .
0,2316 diu wârheit ze der barmede quat .
0,2317 “nû weist dû vile wole daz .
0,2318 daz niht en was .
0,2319 daz den tiuvel an væhte .
0,2320 wan sîn eigene anedæhte .
0,2321 von himel viel er âne nôt .
0,2322 in den êwigen tôt .
0,2323 durh daz er vrî geschaffen was .
0,2324 nû bedenken wir daz .
0,2325 wie von der broeden erden .
0,2326 ein sô vester mennische solte werden .
0,2327 von dem getragen würde .
0,2328 aller mennischen bürde .
0,2329 mit krefte âne zageheit .
0,2330 swenne er diu micheln leit .
0,2331 von dem tiuvel hiete .
0,2332 und von sîner diete .
0,2333 daz er niht geswîche der bürde .
0,2334 ob er sô geschaffen würde .
0,2335 daz er gevallen niene möhte .
0,2336 sô wær daz vrî geslehte .
0,2337 dâ mit niht vergolten .
0,2338 ez ne wære daz wir wolten .
0,2339 dem tiuvel unrehte tuon .”
0,2340 “dâ ne kom ez niemer zuo .”
0,2341 sprach daz heilige rehte .
0,2342 “wellen wir im nemen sîne knehte .
0,2343 daz sol mit rehte werden getân .”

0,2344 “wiser got woltest dû ez an ergân .”
0,2345 sprach aber diu bermede .
0,2346 “daz dû mennischlich ermede .
0,2347 an dich næmest .
0,2348 und daz dû quæmest .
0,2349 in einer reinen megede bûche
0,2350 sô würde wole geholfen ûf .
0,2351 allem mankünne .
0,2352 ob dû âne sünde .
0,2353 von der dû geboren würde .
0,2354 und durch den mennischen erstürbe .
0,2355 sô wurden alle die geheilet .
0,2356 die sich selben niht verteilt .”
0,2357 “ouwê” sprach der gewalt .
0,2358 “waz haben wir an uns gezalt .
0,2359 wie sol uns erteilet werden .
0,2360 des himels . und ouch der erden .
0,2361 und alliu dinc müezen bewaren .
0,2362 mügen wir den stouf niht vervaren .”
0,2363 sprach diu heilige wîsheit .
0,2364 “durch des mennischen sælicheit .
0,2365 werde ez nâch dînem willen volbrâht .”
0,2366 als daz reht vernam die anedâht .
0,2367 dô sprach ez dâr under .
0,2368 unde sprach “wir wellen wûrken wunder .
0,2369 nû sulen wir behüeten daz reht .
0,2370 ob wir dem tiuvel sînen kneht .
0,2371 mügen an gewinnen .
0,2372 daz tuon mit sô getânen dingen .
0,2373 daz er her nâch iht mege .
0,2374 mit decheiner slahte rede .
0,2375 gesprechen ûf sînen schalc .
0,2376 der sich im selben bevalch .
0,2377 daz ist unser êre .
0,2378 und ist iedoch gevüere .
0,2379 des schuldigen knehtes .
0,2380 daz reht dînes rehtes .
0,2381 ist ein gerte dînes rîches .”
0,2382 êr . dô stuont vile vremedicliche .
0,2383 der vride hin dannen .
0,2384 als er die rede vernam .
0,2385 dô spranc er dâr zuo .
0,2386 einander kusten si dô .
0,2387 daz heilige reht und der vride .
0,2388 dô hête diu barmunge vertriben .
0,2389 alle die vîntschafft .
0,2390 diu zwischen dem mennischen unde gote was behaft .
0,2391 ze suone was komen der kneht .

- 0,2392 daz sach von himel daz reht .
0,2393 vile dicke her an die erden .
0,2394 daz der mennische geheilet solte werden .
0,2395 dô der tiefer rât vüre wart .
0,2396 dô kunte got sîne vart .
0,2397 von himel her in erden .
0,2398 daz er mennische wolte werden .
0,2399 ûf sich nam er die sünde .
0,2400 die allez mankünne .
0,2401 an erbe wâren .
0,2402 von hêrren Adâmes jâren .
0,2403 daz tet er kunt den wîssagen .
0,2404 er hiez siu ez niht verdagen .
0,2405 er hiez siu künden überal .
0,2406 daz er den Adâmes val .
0,2407 wolte bringen ze guote .
0,2408 mit sîn selbes bluote .
0,2409 daz tâten si ze wâre .
0,2410 vile unhelbære .
0,2411 wie er mennische wolte werden .
0,2412 und wie er wolte ersterben .
0,2413 daz sageten si verre vore .
0,2414 vluht von dem êwigem verlore .
0,2415 si vlîziclich rieten .
0,2416 gedinge si hieten .
0,2417 ze diu daz im kûmftic was .
0,2418 daz der himel niht durchbrast .
0,2419 daz was vile dicke ire klage .
0,2420 daz in ze helfe dâr abe .
0,2421 ire erloesære .
0,2422 deste schierer komen wære .
0,2423 dô got den willen wolte .
0,2424 ervüllen als er solte .
0,2425 den sîn guottæte .
0,2426 ze dem heile hæte .
0,2427 daz uns dâ solte geschehen .
0,2428 ein maget hiez er vore besehen .
0,2429 kiusche . und reine
0,2430 ledic aller meile .
0,2431 und vile diemüete .
0,2432 michel wâren ire güete .
0,2433 ze der wart ein engel gesant .
0,2434 ze – in daz lant .
0,2435 hin ze einer stete .
0,2436 diu ist geheizen Nazareth .
0,2437 dâr inne sprach sie der got .
0,2438 er gehiez ir heil von gote .
0,2439 mit disen worten grüezet er sie dâ .

0,2440 "heilic wis dû vrouwe – .
0,2441 vol genâden dû bist .
0,2442 unser hêrre mit dir ist .
0,2443 über alliu wîp solt dû gesegenet sîn .
0,2444 und daz wuocher des bûches dîn .
0,2445 dû solt bern ein kint .
0,2446 des diu rîche alliu sint ."
0,2447 der unkunden warte .
0,2448 erkom si vile harte .
0,2449 si sprach "von wie getânen dingen .
0,2450 sol ich kint gewinnen .
0,2451 wan ich nie erkante man .
0,2452 und ouch des decheinen wân .
0,2453 daz ich iemer man erkenne ."
0,2454 dô sprach er an der stunte .
0,2455 "dû treist den wâren gotessun .
0,2456 von dem heiligem geiste entpfæhest dû in .
0,2457 daz kint sol heizen Jêsus ."
0,2458 des antwürtet im diu maget sus .
0,2459 "er ist mîn hêrre unde ich sîn diu .
0,2460 doch bin ich vile unwirdigiu .
0,2461 des daz dû mir vile armer sagest .
0,2462 nû geschehe ez als dû gesprochen habest ."
0,2463 diu maget was gevestenet einen manne .
0,2464 dô si dô gâhes began .
0,2465 von dem kinde grôzen .
0,2466 dô wolte er sie lâzen .
0,2467 tougenlîchen sprach der êwangeliste
0,2468 dô was aber er von Kriste .
0,2469 dâr zuo wirdiger bedâht .
0,2470 daz mit im werde volbrâht .
0,2471 daz er dâ vore hête besehen .
0,2472 âne sache solte ez niht geschehen .
0,2473 daz der gotessun wære .
0,2474 im ze einer muoter næme .
0,2475 eine maget diu bevast was .
0,2476 er tet ez dâr umbe daz si deste baz .
0,2477 dem tiuvel mohte verheltn sîne vart .
0,2478 und daz ouch si dâ mit über wart .
0,2479 des diu alte êwe gebôt .
0,2480 einem iegelîchem wîbe was der tôt .
0,2481 erteilet diu wûrde ervunden .
0,2482 mit sô getânen sünden .
0,2483 dâ von mohten komen kint .
0,2484 âne konelîche dinc .
0,2485 die solte man alle steinen .
0,2486 von sô getânen meinen .
0,2487 mohten si sich übel haben entsaget .

0,2488 hât si des gemahels niht gehabet .
0,2489 er tet ez ouch umbe ein ander dinc .
0,2490 sô si gebære daz kint .
0,2491 daz er ez vaterlîchen zûge .
0,2492 und in Egiptenlant mit im vlûhe .
0,2493 ûz des kûninges æhte .
0,2494 und mit ir daz opfer bræhte .
0,2495 durch sô getâne mære .
0,2496 wolte unser heilære .
0,2497 eine gemahel ze einer muoter nemen
0,2498 diu im doch wole mohte gezemen .
0,2499 und diu doch wære ein maget .
0,2500 ê daz der engel daz sagete .
0,2501 Josephen dem guoten manne .
0,2502 dô wolte er sie gelâzen hân .
0,2503 unz im der engel aber erschein .
0,2504 er sprach “dû solt des aber werden ein .
0,2505 daz dû nemest dîne konen .
0,2506 dô ne darft dâr ab niht erkomen .
0,2507 si sol ein kint gewinnen .
0,2508 daz hât si entvagen .
0,2509 von dem heiligem geiste .
0,2510 mînez gebot dû dâr an leistes .
0,2511 daz ez – werde genant .
0,2512 daz quiut in diutisch zunge heilant .
0,2513 er sol sînen diet entbinden .
0,2514 von allen ire sünden .”
0,2515 der vile sælige man .
0,2516 die vrouwen er ze sich genam .
0,2517 und pflac ir mit huote .
0,2518 unz diu maget guote .
0,2519 des kindes solete genesen .
0,2520 dô hête si ermelîche wesen .
0,2521 sô wir dâ bî kiesen megen .
0,2522 daz man den muose legen .
0,2523 der alliu dinc muoz bewaren .
0,2524 in einer kuo barne .
0,2525 dô sîn diu hêre maget genas .
0,2526 ouwî wie wunderlich doch was .
0,2527 elliu sîn anedâht .
0,2528 daz er in der sweine bâhte .
0,2529 sîn houbet ie geleite .
0,2530 wer aber im daz seite .
0,2531 daz si in niene verâzen .
0,2532 daz wellen wir iu wizzen lâzen .
0,2533 mit kurzlîchen worten .
0,2534 an dem velde den vihehirten .
0,2535 brâhte ein engel diu mære .

0,2536 daz ein heilant wære .
0,2537 geboren ze Bêthlêhêm .
0,2538 er hiez siu drâte dâr gên .
0,2539 dâ si in dâ vunden .
0,2540 mit hadern bewunden .
0,2541 in einer vihekrippen .
0,2542 ermelich licken .
0,2543 als er daz mære sagete .
0,2544 hin umbe daz ez vol tagete .
0,2545 dô wart der engel ein michel teil .
0,2546 die uns daz êwige heil .
0,2547 künden des tages vile gewis .
0,2548 si sungen “ – – – . ”
0,2549 âne sache daz niht ergie .
0,2550 daz er ez die vihehirte wizzen lie .
0,2551 in seite ez ein redelîche bote .
0,2552 si wâren der juden die von gote .
0,2553 ein michelen teil hêten vernomen .
0,2554 und was durch siu her komen .
0,2555 und geboren von ire geslehte .
0,2556 swie er siu geêren mehte .
0,2557 daz hête er gerne getân .
0,2558 daz müget ir dâr an verstân .
0,2559 daz den armen vihehirten .
0,2560 sô grôze mær wurden .
0,2561 von den engelen gesaget .
0,2562 und daz ir wole vernomen habet .
0,2563 daz den drîn hêrren .
0,2564 die dâ künige wâren .
0,2565 in küniges geslehte .
0,2566 in vile kleiner ahte .
0,2567 mit einem vile unredelich dinge .
0,2568 daz niht hête stimme .
0,2569 und was ouch unverstentlich .
0,2570 dem vihe lebeten si gelîch .
0,2571 und en wessen waz got was .
0,2572 von diu was reht daz .
0,2573 dô si niht sinnes haben wolten .
0,2574 daz in daz kint zeigen solte .
0,2575 ein unredehafte bote .
0,2576 alsus bedâhte ez allez got .
0,2577 waz daz zeichen wære .
0,2578 daz die künige mære .
0,2579 hin ze dem hûse leitte .
0,2580 und in daz kint zeigte .
0,2581 daz hât uns geschriben dâ .
0,2582 – – .
0,2583 an sînen heiligen buochstaben .

0,2584 er sprichet in den tagen .
0,2585 dô geboren wart daz kint .
0,2586 des diu rîche alliu sint .
0,2587 dô schein ein liehter sterne .
0,2588 in dem ôstern rîche verre .
0,2589 drîn künigen mæren .
0,2590 dô si ûz gegangen wâren .
0,2591 schouwen an daz gestirne .
0,2592 in der liste lirne .
0,2593 hêten si sich gevlîzen .
0,2594 daz si mohten wizzen .
0,2595 allez daz in kûmftic was .
0,2596 ire muot gehiez in daz .
0,2597 daz ein küninc wære geboren .
0,2598 der wær über al die werlt erkoren .
0,2599 ze hêren iemer solte sîn .
0,2600 si giengen drâte dâr wider in .
0,2601 und nâmen drîer slahte gebe .
0,2602 si volgeten nâch dem wege .
0,2603 den sî dâ wîste der sterne .
0,2604 ûz dem ôstern rîche verre .
0,2605 begunde er in allez vore gên .
0,2606 unz in die burc ze Jerusalêm .
0,2607 dâ hal er sich ze einer vrist .
0,2608 als uns dâ von geschriben ist .
0,2609 daz si ez niht en sâhen .
0,2610 dô begunden si vrâgen .
0,2611 wâ daz kint wære .
0,2612 der küninc ist über Isrâhêle .
0,2613 der dâ wære geboren .
0,2614 den hêten si dâr zuo erkoren .
0,2615 daz si in an beten gerne .
0,2616 und in erschîne ein sterne .
0,2617 der si dâr hête brâht .
0,2618 ein vile übel anedâht .
0,2619 hête der küninc Herôdes .
0,2620 er wânte sicherlîchen des .
0,2621 daz im iemannd vore wære .
0,2622 er und alle die burgære .
0,2623 wurden dirre worte .
0,2624 betrüebet vile harte .
0,2625 dô si ez vernâmen .
0,2626 vile harte si erkâmen .
0,2627 ze sundersprâchene er dô nam .
0,2628 die drî dâr komene manne .
0,2629 er vrâgete siu der mære .
0,2630 wie in der stern erschinen wære .
0,2631 daz tâten si im ze wizzen .

0,2632 alle die sich gevlizzen .
0,2633 hêten in den buochen .
0,2634 die hiez er im suochen .
0,2635 die wîseste in dem gesinde .
0,2636 er vrâgete von dem kinde .
0,2637 von den die prophêten .
0,2638 gewîssaget hêten .
0,2639 wâ des geburt solte ergên .
0,2640 si sprâchen “ze Bêthlêhêm .”
0,2641 und sageten im daz .
0,2642 daz der bürge zuo was .
0,2643 gesprochen von dem wîssagen .
0,2644 daz wir alle niene mügen .
0,2645 mit worten vervâhen .
0,2646 dô si im dô verjâhen .
0,2647 daz si von dem kinde hêten gelarn .
0,2648 und dô die hêrren wolten varn .
0,2649 dô bat siu der küninc Herôdes .
0,2650 vile vlîziclichen des .
0,2651 sô si daz kint vunden .
0,2652 daz si im ez solten künden .
0,2653 er solte ouch digen an .
0,2654 daz was mit ungetriuwen .
0,2655 als er wole erzeigte sît .
0,2656 und als uns daz buoch seit .
0,2657 swaz er wunders dâ .
0,2658 und ouch sît anderswâ .
0,2659 in drîn und drîzic jâren begie .
0,2660 dô er was mennische hier .
0,2661 und in sehs und zweinzic wochen .
0,2662 daz ist uns allen offen .
0,2663 wie ermelich er hier was .
0,2664 unz er ervûlte allez daz .
0,2665 daz die prophêten .
0,2666 von im gewîssagt hêten .
0,2667 dem rehte gienc er wole nâch .
0,2668 unz er sîne verlorene schâf .
0,2669 wole wider heim brâhte .
0,2670 gegen einer iegelîchen sünde er gedâhte
0,2671 einer ebengelich buoze .
0,2672 die bittere gegen der süeze .
0,2673 die er lîden solte .
0,2674 wan dô der tiuvel Even vellen wolte .
0,2675 dô gehiez er in beiden .
0,2676 mit ungetriuwen eiden .
0,2677 als si des obezzes enbîzen .
0,2678 daz si vüre wâr solten wîzen .
0,2679 beidiu daz wîp und der man .

0,2680 daz si wurden als got getân .
0,2681 im ebenrîche und ebenhêr .
0,2682 und dô si dô mêr .
0,2683 selbe gewinnen wolten .
0,2684 denne si haben solten .
0,2685 dâ von wurden si versalt .
0,2686 in des tiuvels gewalt .
0,2687 und in daz êwige leit .
0,2688 dô si gevielen mit der gâticheit .
0,2689 und mit der übermüete .
0,2690 und mit üppiger güete .
0,2691 und wurden ungehôrsum .
0,2692 und hêten manslaht getân .
0,2693 und ein – .
0,2694 wie mûgen ez iemer wir ez getuon .
0,2695 si wurden ouch meineide
0,2696 daz wart in billîchen ze leide .
0,2697 wan si hêten den verloren .
0,2698 der siu hête erwelt und erkoren .
0,2699 den engelen in der hoehe .
0,2700 und der mennischlîchen broede .
0,2701 zuo im selbem hête vereinet .
0,2702 daz ist alsô gemeinet .
0,2703 dô got geschuof unser vleisch .
0,2704 dô nam er sîn selbes geist .
0,2705 und blies den dâr in .
0,2706 daz wir sîne solten sîn .
0,2707 und er unser houbet .
0,2708 des hêten si sich beroubet .
0,2709 durch des tiuvels rât .
0,2710 daz was ein michel meintât .
0,2711 dô si gotes hulde .
0,2712 von ir selber schulde .
0,2713 verluren sô manigen wîsen .
0,2714 dâ bî solte ir sîn gewis .
0,2715 swer von des tiuvels schulde .
0,2716 ein houbethafte sünde .
0,2717 getuot oder hât getân .
0,2718 er muoz ire aller schuldic stân .
0,2719 die uns dâ verboten sint .
0,2720 und alle die vûre einen wint .
0,2721 diu gotes gebot wellent haben .
0,2722 si getuont vile lîhte schaden .
0,2723 alsô ergienc ez Even und Adâmen .
0,2724 dô si die wârheit wolten haben ze einen wâne .
0,2725 und vûre einen hinderlist .
0,2726 die in der heilige Krist .
0,2727 durch allez guot zuo sprach .

0,2728 dô ez dô Adâm zebrach .
0,2729 dô was verirret ire geloube .
0,2730 und wâren gevallen an dem roube .
0,2731 und wurden ungehørsam .
0,2732 und ein – getân .
0,2733 und hêten uns alsament erslagen .
0,2734 daz mügen wir vüre michelen nôt sagen .
0,2735 si wâren ledic unkiuscher dinge .
0,2736 alliu ire minne .
0,2737 was ein wünne ire geistes .
0,2738 âne girede ire vleisches .
0,2739 got hête si im ze trûte genomen .
0,2740 daz von in reiner wuocher wær komen .
0,2741 die minne si getruobten .
0,2742 der reinen vriedel si überhügeten .
0,2743 die wâren minne si vluchen .
0,2744 zuo dem tiuvel si sich zugen .
0,2745 ze trûte si den nâmen .
0,2746 der mit sînem sâmen .
0,2747 erquikte boesez minnen .
0,2748 ire fleisch muose brinnen .
0,2749 wande dô begunde ez gern .
0,2750 des si ez vile dicke muosen wern .
0,2751 daz was ein michel überhuor .
0,2752 mit dem willen Adâm des swuor .
0,2753 dô im got daz obez verbôt .
0,2754 und im dâ von gehiez den tôt .
0,2755 daz er ez iemer mîden wolte .
0,2756 als er von rehte solte .
0,2757 dô wart er meineide .
0,2758 daz got iht underscheide .
0,2759 unser zunge . oder den munt .
0,2760 des ist undurft im was unkunt .
0,2761 elliu unser anedâht .
0,2762 êr . daz herze habe vüre brâht .
0,2763 gedanc oder willen .
0,2764 überlût . oder stille .
0,2765 sô ist ez im allez kunt .
0,2766 sîn ist undurft daz im der munt .
0,2767 immer iht bescheide .
0,2768 ez sint allez eide .
0,2769 swaz im daz herze gelobet .
0,2770 ouwê wie harte er tobet .
0,2771 der daz immer widerreit .
0,2772 ez ne sî ein meiner eit .
0,2773 swaz wir im geheizen .
0,2774 ob wir des niht leisten .
0,2775 sî hêten ouch daz meiste – getân .

0,2776 daz ie dechein man .
0,2777 ûf der erde getet .
0,2778 daz si an einer sô heiligen stete .
0,2779 ie . missetâten .
0,2780 und daz niht bedâhten .
0,2781 daz ez was in dem paradîse .
0,2782 von diu ist er unwise .
0,2783 der dâ sprichet daz Adâm .
0,2784 niht vile hête getân .
0,2785 wider die goteshulde .
0,2786 wan er sie verlôs mit voller schulde .
0,2787 wie grôz diu schulde wære .
0,2788 doch erbarmete unserm schepfære .
0,2789 unser êwigez leit .
0,2790 doch en wolte er die wârheit .
0,2791 noch daz reht niht schenden .
0,2792 er wolte ez anders wenden .
0,2793 er wolte ouch dem tiuvel niht gewalt tuon .
0,2794 sîn erbermede und sîn wîstuom .
0,2795 die gedâhten einer wâge .
0,2796 sam ob dâr ûf læge .
0,2797 alliu diu schulde .
0,2798 dâ mit si verluren gotes hulde .
0,2799 dâr zuo kom daz reht gesezzen .
0,2800 ez begunde vlîziclichen mezzen .
0,2801 dô diu schulde wart ûf getragen .
0,2802 und man die wâge enbore solte haben .
0,2803 sô was daz unreht sô swære .
0,2804 ob allez guot dâr gegen geleit wære .
0,2805 daz ie iemannd getet .
0,2806 sô en wær diu wâge von der stete .
0,2807 niemer erwegen .
0,2808 unze sich got dâr ûf muose legen .
0,2809 dô gedâht diu gotes wîsheit .
0,2810 wie sich unser leit .
0,2811 von êrste hête erhaben .
0,2812 dem wolte er ein gelîchez tragen .
0,2813 ze dem êrste ûf die wâge .
0,2814 swer uns nû vrâge .
0,2815 wie sich hûebe der val .
0,2816 den berihten wir sîn wole .
0,2817 daz kom von einem wîbe .
0,2818 diu wart mit nîde .
0,2819 von dem tiuvel bestanten .
0,2820 wie si si geschanden .
0,2821 des wurden si ze râte .
0,2822 swer si alsô drâte .
0,2823 mohte geschinden .

0,2824 ze den oberesten sünden .
0,2825 diu dâ heizet übermuot .
0,2826 ez en wart nie niht sô unguot .
0,2827 ez wart ouch gote nie niht sô leit
0,2828 des hêten si die wârheit .
0,2829 an im selben entstanten .
0,2830 einen boesen geist si santen .
0,2831 in daz paradîse .
0,2832 der kom geslîchen lîse .
0,2833 zuo der getelôsen .
0,2834 er tet ir ein rât boesen .
0,2835 den nam si vûre guot .
0,2836 durch ire übermuot .
0,2837 und durch ire gîticheit .
0,2838 gap si genâde umbe leit .
0,2839 dâ wider wart von gote .
0,2840 ein vile redelîche bote .
0,2841 ze einer megede gesant .
0,2842 an der . man dechein bôsheit vant .
0,2843 und diu nie getelôs wart .
0,2844 noch dechein hôchvart .
0,2845 in ire herze nie gewan .
0,2846 und die nie nihtes gezam .
0,2847 wan daz ir got gegeben hête .
0,2848 und nie begie dechein üppige güete .
0,2849 ire kiusche . und ire reine .
0,2850 diu wâgen wider diu meine .
0,2851 die der tiuvel an truoc .
0,2852 dâ mit er allez mankünne ersluoc .
0,2853 dâ wider wolte got wider geben .
0,2854 uns daz êwige leben .
0,2855 dô was ouch daz billich .
0,2856 daz dirre rât heimelich .
0,2857 vore dem tiuvel wær verholen .
0,2858 als ouch er verstolen .
0,2859 zuo der armen Even sleich .
0,2860 unz er uns alle besweich .
0,2861 der übel engel der louc .
0,2862 unz er daz arm wîp betrouc .
0,2863 er gruozte sie ouch dâ mite .
0,2864 daz er ir einen vluoch tete .
0,2865 wan ditz sîn êrste rede was .
0,2866 “wê . ze wiu lât ir daz .
0,2867 daz ir alles des obezzes niht ezzet .
0,2868 daz ir hier inne wizzet .”
0,2869 alsô ist ez an dem sinne .
0,2870 versweigen wir ez wê unser stimme .
0,2871 sô sprach er ez doch mit dem muote .

0,2872 er hiete sî als lîhte geschündet ze guote .
0,2873 wan daz er daz gerne sach .
0,2874 daz ir vile wê geschach .
0,2875 er gehiez ouch ire vile wærlîche .
0,2876 si wurden gote gelîch
0,2877 ob si daz obez æze .
0,2878 daz si ez ze nihte widersæze .
0,2879 der disiu wort verstêt nâch der schrift .
0,2880 sô was ez ein vluoch und ein vergift .
0,2881 dâ wider wart der megede ein segen .
0,2882 von dem engel gegeben .
0,2883 den got ze ir dâr sante .
0,2884 swaz er ir ouch kunde .
0,2885 daz selbe daz ergie .
0,2886 als er die rede ane vie .
0,2887 er gehiez ir ouch diu dinc .
0,2888 diu einem wîbe sorgelich sint .
0,2889 wan ez niemer en wirdet .
0,2890 swâ ein wîp kint gebiret .
0,2891 si kome sîn in angest und in nôt .
0,2892 wider dem guote daz der tiuvel bôt .
0,2893 dâ wider wolte got sîn heil geben .
0,2894 wider den vluoch . den segen .
0,2895 wider die lüge die wârheit .
0,2896 der man gehiez die rîchheit .
0,2897 diu entvie den êwigen tôt .
0,2898 der man aber gehiez die kûmftigen nôt .
0,2899 diu entvie daz êwige leben .
0,2900 diu müeje was ir ouch gegeben .
0,2901 halt mit michelem vollen .
0,2902 dô diu maget unbewollen .
0,2903 von dem kinde begunde grôzen .
0,2904 dô mahte diu natûr niht verlâzen .
0,2905 ir ne würde eteswenne wê .
0,2906 daz hête got wole geordenet êr .
0,2907 wie der ire reine lîp .
0,2908 vüre daz schuldige wîp .
0,2909 im solte helfen bûezen .
0,2910 Eva gewan nie sô grôze sîeze .
0,2911 mit dem gedingen vüre sich .
0,2912 daz si gote würde gelîch .
0,2913 in entgûlte Maria .
0,2914 mit riuwen volliclîchen dâ .
0,2915 dô si sach daz man ire sun vie .
0,2916 und dô si zuo dem kriuze gie .
0,2917 dô buozte si alle die trite .
0,2918 die diu arme zuo dem holze tete .
0,2919 man saget uns ze wâre .

0,2920 daz ez daz holz wære
0,2921 dâ der mennische an geviele .
0,2922 alle die liebe .
0,2923 die Eva dâr zuo gewan .
0,2924 daz si und ire man .
0,2925 solten werden sô here .
0,2926 die galt – mit sêre .
0,2927 dô man den an sluoc .
0,2928 den si in ire bûche truoc .
0,2929 diu maget galt mit darben .
0,2930 daz ezzen dâ diu unkarge .
0,2931 dâ az ire schaden .
0,2932 si muose sich durch nôt enthaben .
0,2933 dô si ire sun lieben .
0,2934 sach hâhen zuo den dieben .
0,2935 dô si in an daz kriuze . nageln sach .
0,2936 und dô man in durch die sîten stach .
0,2937 dô was ire herzen vile wê .
0,2938 nû sî niemand der ez sô verstê .
0,2939 daz diu maget reine .
0,2940 iht buozte alterseine .
0,2941 vüre daz schuldige wîp .
0,2942 nein sô hête der tiuvel lîht .
0,2943 gezogen in sîn reht .
0,2944 daz im sîn diu und sîn kneht .
0,2945 niht wâren vergolten .
0,2946 als si von rehte solten .
0,2947 die er an dem roube gevie .
0,2948 dâr umbe sich got ouch martern lie .
0,2949 dô diu gotesgüete .
0,2950 mit vile manigem râte .
0,2951 den gewalt des übergie .
0,2952 daz er sînen zorn lie .
0,2953 und daz er nemen wolte .
0,2954 ob im der mennische gülte .
0,2955 und daz er im ze rehte wolte gestân .
0,2956 daz er wider in hête getân .
0,2957 dô en hête menschlich geslehte .
0,2958 niht sô vile reinez daz ez vergelten mehte .
0,2959 sô michel was ire ermede .
0,2960 dô sprach aber diu erbermede .
0,2961 ze dem habendem gewalte .
0,2962 einen menschlichen der mit im selben galt .
0,2963 den sante er uns ze trôste .
0,2964 der mit sîn selbes lîbe erlôste .
0,2965 allez mankünne .
0,2966 umbe ein iegelich sünde .
0,2967 wolte er buoze lîden .

- 0,2968 und im selben niht entlîben .
0,2969 daz der hêre Adâm .
0,2970 dâr an hête missetân .
0,2971 daz er hôher komen wolte .
0,2972 denne er von rehte solte .
0,2973 dâ leite dirre mennische widere .
0,2974 daz er sich selben sô nidere .
0,2975 von hôhen dingen brâhte .
0,2976 daz er in dem bâhte .
0,2977 vore den rindern lac .
0,2978 ouwê . wie er die wâge wac .
0,2979 und wie er dem rehte nâch gie .
0,2980 den tiuvel er sich bekoren lie .
0,2981 rehte drî stunte .
0,2982 mit der selben sünde .
0,2983 dar Adâm an geviel .
0,2984 in des tiuvels giel .
0,2985 mit vasten er ouch buozte .
0,2986 vierzic tage in der wüeste .
0,2987 daz Evê mit Adâm .
0,2988 hêten ein – getân .
0,2989 und ein überhuor .
0,2990 und daz ir ietwederz meines swuor .
0,2991 und lêrte uns dâ mite .
0,2992 daz wir vuoren mit guotem site .
0,2993 ûz den unmuozen .
0,2994 sô wir wolten bûezen .
0,2995 unde sô wir iht guotes beginnen wolten .
0,2996 wie wir uns dâ vore tempern solten .
0,2997 in der selben wüeste .
0,2998 bekoret in der tiuvel allerêrste .
0,2999 mit der kelgîticheit .
0,3000 dô er sô lange meit .
0,3001 daz er niht az noch en tranc .
0,3002 des hête der tiuvel manigen gedanc .
0,3003 wie daz komen mahte .
0,3004 daz er sam sîn ander geslehte .
0,3005 niht æze noch en trünke .
0,3006 daz begunde in seltsæne dunken .
0,3007 und wolte sich dâr von nemen .
0,3008 der gedanc was nie sô schiere komen .
0,3009 sô sich der gotessun hungern lie .
0,3010 ze diu daz er in undervie .
0,3011 und tet ouch dem satânât .
0,3012 des versuochenes state .
0,3013 alsô der vâlant .
0,3014 an im ervant .
0,3015 daz in hungerete .

0,3016 er sprach “nû mache den stein ze brôte .
0,3017 ob dû ez seist der gotessun .
0,3018 sô maht dû ez harte wole tuon .
0,3019 und sate dich dâr mite .
0,3020 nâch gewonêlichem site .
0,3021 ob dir der hunger sô leit .”
0,3022 zuo der kelgâticheit .
0,3023 hête er in gerne getriben .
0,3024 “nû weist dû wole daz ist geschriben .
0,3025 daz der mennische niht eingenôte .
0,3026 mac geleben von dem brôte .
0,3027 er ne habe daz goteswort dâr zuo .”
0,3028 mit hunger büezet er dô .
0,3029 der arm kelgâticheit .
0,3030 ze vertilgen unser leit .
0,3031 dô dâ der vâlant .
0,3032 dechein stat an im vant .
0,3033 dô vuorte er in ze Jerusalêm .
0,3034 und bat in algerihten stên .
0,3035 ûf daz tÊmpel obene .
0,3036 unde hiez in den liuten ze lobene .
0,3037 daz er hin abe viele .
0,3038 er sprach “dir koment schiere .
0,3039 die engel und heben dich enbore .
0,3040 si sint dir allenhalben vore .
0,3041 und daz si dich vüeren .
0,3042 und dîne vüeze den stein iht rüeren .”
0,3043 des antwurte im der heilant .
0,3044 “var vürder vâlant .
0,3045 jâ ist ouch geschriben daz .
0,3046 daz dû unreinez vaz .
0,3047 dînen hêrren niht solt bekoren .
0,3048 dû hâst dîne arbeit verloren .”
0,3049 dâ mit galt er diemüete .
0,3050 die üppigen güete .
0,3051 die Eva . und Adâm .
0,3052 dâr an hêten getân .
0,3053 daz si gelobet wolten werden .
0,3054 von den liuten ûf der erden .
0,3055 umbe ire guote . und umbe ire zeichen .
0,3056 dô er in dô niht mohte erweichen .
0,3057 zuo der üppigen guote .
0,3058 dô wolte er in bekoren mit der übermüete .
0,3059 dô vuorte er in ûf ein hoehe .
0,3060 und sprach swaz er übersæhe .
0,3061 daz er in des gewaltic tæte .
0,3062 ob er in nider vallente bæte .
0,3063 dô hiez er in vürder schaben .

- 0,3064 er sprach daz daz geschriben .
0,3065 offentlichen wære .
0,3066 daz er sînen schepfære .
0,3067 billichen ane bâte .
0,3068 dâ buozte er die missetæte .
0,3069 die Eva . und Adâm .
0,3070 dâr an hêten missetân .
0,3071 daz si wolten gotes rîchtuom .
0,3072 dâr nâch liez er im tuon .
0,3073 als einem diebe .
0,3074 der gefangen wirdet an roube .
0,3075 alsô liez er sich villen .
0,3076 durch unsern willen .
0,3077 und lie sich vaste gihten .
0,3078 und über sîn ougen rihten .
0,3079 als man über die Adâmes solte .
0,3080 die dâr leiten dâ . der tiuvel wolte .
0,3081 wande er uns verbinden lie .
0,3082 under den galgen strûchente gie .
0,3083 er wart bespott und bespiren .
0,3084 mit krademe beschriren .
0,3085 als man iemer den tuot .
0,3086 der dem anderm stilet sîn guot .
0,3087 und dâr mit wirdet gefangen .
0,3088 den besmirwent alle die dâr zuo koment gegangen .
0,3089 alsô liez er under dieben lônem .
0,3090 er lie sich mit dornen kroenen .
0,3091 daz tâten die juden durch ire haz .
0,3092 dâ mit galt er wole daz .
0,3093 daz Eva und Adâm .
0,3094 die sîne goteskrône wolten hân .
0,3095 und künincriche .
0,3096 dâ galt er vollicliche .
0,3097 in dûhte billich und reht .
0,3098 ob der schuldige kneht .
0,3099 von dem holze nam den tôten .
0,3100 daz uns ouch hülfe von der nôten .
0,3101 dâr umbe er an daz kriuze gie .
0,3102 die hende er ouch durchstechen lie .
0,3103 die daz obez dâ nâmen .
0,3104 daz solte man Adâmen .
0,3105 und vrouwen Even getân .
0,3106 nû stuont aber dirre guot man .
0,3107 vüre siu an ir beider stete .
0,3108 alle ire unnütze trite .
0,3109 die rihte man über sîn vüeze .
0,3110 er tranc ouch vüre die süeze .
0,3111 diu ûz dem obezze dâ gie .

- 0,3112 daz ir beider munt entvie .
0,3113 die gallen und den ezzich .
0,3114 sîn herze entvienc ouch einen stich .
0,3115 umbe die boesen anedâht .
0,3116 diu siu beide ane vaht .
0,3117 daz diu von argestem gie .
0,3118 umbe daz mort er sich hâhen lie .
0,3119 daz Eva . und Adâm .
0,3120 an uns allen hête getân .
0,3121 dâr umbe liez er sich begraben .
0,3122 als er an drittem tage .
0,3123 uns vore erstên wolte .
0,3124 daz wir sam erstên solten .
0,3125 er wolte ouch daz würde .
0,3126 mit der selben verte .
0,3127 diu mennischheit geêret .
0,3128 und ouch daz gelêret .
0,3129 wie wir ze der heimuote solten komen .
0,3130 diu uns dâ wart benomen .
0,3131 dâ wart der tiuvel mit betrogen .
0,3132 daz im ûz der hant wær gezogen .
0,3133 mit rehte allez mankünne .
0,3134 wande er Adâm vant âne sünde .
0,3135 unz er im zuo gelouc .
0,3136 daz er in zuo den sünden betrouc .
0,3137 dô zôch er in ze sich sâ .
0,3138 daz reht verlôs er gar dâ .
0,3139 dô er sich des underwant .
0,3140 an dem er sînes niht en vant .
0,3141 und in âne alle schulde hie .
0,3142 dâ mit verlôs er alle die .
0,3143 die er mit rehte hête gehabet .
0,3144 daz ist iu dicke vore gesaget .
0,3145 swer dem anderm daz sînez nimet .
0,3146 ob er im denne nâch kümet .
0,3147 der nimet im wole daz selbe guot .
0,3148 und swaz er im anders getuot .
0,3149 daz ist unwandelbære .
0,3150 vore dem tihtære .
0,3151 alsô ergie ez dem vâlände .
0,3152 sich selben er geschande .
0,3153 dô er niht an sehen wolte .
0,3154 sîne grôze unschulde .
0,3155 der nie dechein sünde .
0,3156 getet noch gevrumete .
0,3157 dô daz der tiuvel geriet .
0,3158 daz man als einen diep .
0,3159 den gewîhten gotessun erhie .

0,3160 dô vuor er hin ze helle und hiez die .
0,3161 daz si sich ûf tæte .
0,3162 vroelîchen und drâte .
0,3163 si solte den entwâhen .
0,3164 und er sæhe in hâhen .
0,3165 der sich dâ hiez den gotessun .
0,3166 si solte ez vroelîchen tuon .
0,3167 und er hête ez gerâten .
0,3168 mit den die ez dâ tâten .
0,3169 und si solte in niemer quelen .
0,3170 des antwurte im diu helle .
0,3171 “ez wæne anders geschihet .
0,3172 ze wâr ich sihe ein michel licht .
0,3173 scheinen vore der helle .
0,3174 ich wæne ez her welle .
0,3175 âne zwîvel dû bist betrogen .
0,3176 ich hoere die ire schepfære loben
0,3177 die wir dâ hêten in getân .
0,3178 Even und Adâm .
0,3179 und alle die wîssagen .
0,3180 die jehent daz si den vernomen haben .
0,3181 der in ie daz gehieze .
0,3182 daz er si underwegen iht lieze .”
0,3183 dô kom der vater . und der sun .
0,3184 dô si uns genâde wolten tuon .
0,3185 und der heilige geist .
0,3186 dem armen ze volleist .
0,3187 die dâ wâren in dem êwigem verlore .
0,3188 und zestiezen daz tor .
0,3189 daz ez allez zebrast .
0,3190 dâr inne erschein ein unkunder glast .
0,3191 den er dâ hête geladen .
0,3192 der kom im nâch sînem schaden .
0,3193 den hellegrâven er gebant .
0,3194 swaz er der rehten dâr inne vant .
0,3195 die vuorte er vroelîche .
0,3196 mit sament im in sîn rîche .
0,3197 dâr nâch an drittem tage .
0,3198 dô erstüende er von dem grabe .
0,3199 nû vrâgent genuoge der mære .
0,3200 wâ er under diu wære .
0,3201 unz an den dritten tage .
0,3202 ich en kan noch en mac .
0,3203 iu dâr von niht gezelen .
0,3204 sûmlîche die wellent .
0,3205 daz der schâchære .
0,3206 der êrster nâch gote wære .
0,3207 der ûf tet daz paradîse .

0,3208 dô ez got der wîse .
0,3209 von der helle gewan .
0,3210 ouch widerreit ez manic man .
0,3211 tuo der gewîhte gotessun .
0,3212 den roup dem an gewan .
0,3213 den er wænen wolte .
0,3214 daz er in iemer haben solte .
0,3215 und dô kom hin widere .
0,3216 von dirre nidere .
0,3217 in sînes vateres rîche .
0,3218 dâ gebârten vremedicliche .
0,3219 die engel alle wider in .
0,3220 unde trahten alle wer er mohte sîn .
0,3221 und sprâchen swer er wære .
0,3222 nû stuont sîn wât sam einen torkelære
0,3223 des antwürtet im mit diemüete .
0,3224 daz er die torkeln eine hête .
0,3225 und im hülfe niemannd dâr zuo .
0,3226 vüre daz die engel dô .
0,3227 reht an im erkanten .
0,3228 und an sînem bluotvarem gewande .
0,3229 daz den stuol die mennischheit .
0,3230 hête gewonnen mit arbeit .
0,3231 den si des tages besaz .
0,3232 dô gunden si uns desten baz .
0,3233 vüre die wîle iemer mêre .
0,3234 der iu gemachet habe sô here .
0,3235 mit sîn selbes bluote .
0,3236 dem lônnet sîn mit guote .
0,3237 oder ich sage iu ze wære .
0,3238 daz iu bezzet wære .
0,3239 daz der selben verte .
0,3240 nie gedâht würde .
0,3241 nû loben wir den gotessun .
0,3242 – – – .
0,3243 âmen .